

## CAPUT IX. DE FEBRIBUS.

I.

**F**ebris est actus naturæ autocraticus, quo sub pulsu celeri & frequenti, motibusque secretoriis & excretoriis extra ordinem quidem auctis, adæquate tamen susceptis, materiam aliquam corpori noxiā, partibusque vel fluidis damnum inducentem, aut minitantem, quovis possibili modo corrigerē, subigere, vel e corpore eliminare intendit: eoque ipso graviora damna preoccupare studet atque conatur.

SCHOL.

Ex hac febris definitione patet, id, quod vulgo febris vocatur, non esse morbum aut læsionem, sed remedium naturale, contra læsionem a natura adhibitum, quamvis hoc remedium revera aliquas molestias, quas symptomata vocamus, post se trahat junctasque habeat, quæ illud necessario, ut umbra corpus, sequuntur.

Dicimus autem, motus hos secretorios & excretorios extra ordinem esse auctos, quoniam nullatenus sunt novi, aut ab œconomia animali plane alieni, sed essentialiter plane iidem, quibus tota nostra vita quotidie conservatur atque absolvitur: cum autem ejusmodi causæ materiales, quæ hosce motus extraordinarios quoad gradum postulant, non omni tempore dieque in corpore præsto sint, ideo neque quotidie talis motuum secretoriorum & excretoriorum gradus requiritur, multo minus occurrit.

II.

*Sunt tamen hi motus ut plurimum adæquate suscepti.*

SCHOL.

Non equidem afferimus, hos motus proportione physica ad amissim semper pro causæ præsentia quadrare; interim tamen generaliter semper hi motus ita sunt comparati, ut materiae noxiæ subactionem & excretionem maxime ordinatam intendant: id quod exinde adpareat,

Bb 3

quod

quod 1. totus ille actus in omni febre ad unam aliquam excretionem in genere tendat; 2. quod hanc excretionis intentionem ordinarie præparatio aliqua antecedat: 3. quod ordinarie in singulis febribus speciebus motus excretorii fiant, tam pro conditione materiae excernendæ, quam pro loco, ubi materia excernenda hæret aut hospitatur, adæquati & proportionati, prout hoc facile adparet in quibusdam intermittentibus, quarum causa materialis crudior, in primis viis oberrans, excretionibus anotericis aut catothericis ansam præbet, quemadmodum in plurimis continuis materie subtilioris, in humoribus sedem habentis, excretionis & motus a centro ad & per peripheriam contingere solet.

## III.

*Febres inter se invicem differunt variis respectibus: & quidem 1. ratione PERIODI, ac generalis decursus, quem ordinarie servant.*

## SCHOL.

Hoc intuitu differunt febres *acutæ* a *chronicis*: quarum illæ vere acute non modo incipiunt, sed etiam cursum suum sine intermissione accelerant, ita, ut breviori temporis spatio totum decursum, eventu vel vitali ac salutari, vel funesto absolvant.

Hæ vero non modo leniori, sed & tardiori gradu incedunt, diutiusque durant, & non per dies, sed per septimanas, imo menses terminantur, cuius census sunt omnes intermittentes, lenta & hectica.

## IV.

2. *Differunt quoque ratione TYPI, quem singula species respectu recurrentium paroxysmorum format.*

## SCHOL.

Respectu hujus typi, singulæ speciei proprii, ex acutis aliæ sunt *continuae*, aliæ *continentes*: ex chronicis vero intermittentes varia.

Continuae plenariam paroxysmorum intermissionem nullam, remissionem tamen aliquam agnoscunt, sive illa magis aut minus manifeste, tempore matutino, sive vespertino, sive quocunque alio, statu tamen ac certo, contingat.

Conti-

ad unam aliquam excedit, non intentionem ordinari, serie in singulis febribus ipsius materie exceneditur, rarer sur holpitatur, sive in quibusdam intermissionibus viis oberrans, excedit, quemadmodum in pluribus febribus habentia, excentur soleat.

Continentes nec remissionem nec intermissionem ullam habent, sed a prima invasione ad declinationem usque uno impetu durant; ad quarum classem pertinet ephemera, & synochus, tam simplex, quam putrida.

Intermittentes autem se ipsas dividunt in quotidianas, tertianas & quartanas: quæ omnes perfectas paroxysmorum intermissiones servant, & ægris orthostadiam tempore intercalari permittunt, atque, quamdiu simpliciter tales manent, legitimæ audiunt, si autem multum ab ordine recessunt, anomala, spuriæ, duplicate aut compositæ vocantur.

## V.

3. Nec minor occurrit differentia febrium, respectu C A U S A R U M manifestiorum antecedentium, aut concurrentium.

## SCHOL.

Hoc intuitu occurrent febres biliosa, si nempe post iracundiam percessam bilis commota aut effusa, vel in massam sanguineam delata, motibus febrilibus, sanguinisque intestinis vehementioribus ansam præbet, vel in intestinis, eorumque tunica interior, aut etiam in ventriculo, rodendo vel ardendo, sensationem molestam, ac inflammationem producit.

Sanguinea, si propter sanguinis abundantiam solam, vel pro fine evacuationis sinceræ per hæmorrhagias, vel pro dissolutione in serum, & imminutione resolutoria persudores largissimos, motus illi extraordinarii instituuntur.

Catarrhales, quæ ut plurimum excretionum periphericarum suppressiones, & retrocessiones pro causa agnoscunt.

Lætæ, si puerperis aut nutricibus a lacte stagnante eveniant.

Lochiales, si in iisdem puerperis lochiorum fluxus impeditus, aut penitus suppressus, causam suppeditaverit.

Inflammatoria & vulneraria, quando vel partis cuiusdam internæ nobilioris inflammationem sequuntur, vel vulneribus gravioribus supervenient.

## VI.

4. Alia occurrit differentia, respectu SYMPTOMATUM cum febribus complicatorum, vel essentialiter ad illas pertinentium

SCHOL.

## SCHOL.

Hac ratione in considerationem veniunt ex acutarum & continuarum classem, *exanthematicæ*, quales sunt petechiales, & petechizantes, purpuratæ albæ & rubræ, papulares, erysipelaceæ, scarlatinæ, variolæ atque morbilli.

His aliqui medicorum alias adhuc subdivisæ species adjunxerunt, a certis excretionum symptomaticarum speciebus desumptas, & aliquando in paucis quibusdam individuis observatas, quæ tamen hanc considerationem non merentur, ut certam febrium speciem constituere valeant: cujus generis sunt sudatoriaæ, vomitoriaæ, aliæque.

## VI.

*Quinta febrium differentia desumitur a propria febris INDOLE, qua ratione a benignis differunt malignæ.*

## SCHOL.

Ad priorum classem pertinent tam intermitterentes legitime omnes, quam ex acutis & continuis illæ, quibus, licet multi afficiantur, pauci tamen e medio tolluntur, vel sub multis anomalis symptomatis, gravissimo periculo subjiciuntur, sed plurimi sub placidis ac legitimis motibus secretoriis & excretoriis ad sanitatem pervenient.

Ad posteriorum vero numerum referendæ sunt, ex acutis, illæ omnes, quæ propter materiæ peccantis specialem constitutionem, eamque neque per artem, neque naturæ motibus alterabilem, aut secretioni & excretioni non obedientem, in plurimis aut aliquibus ægrotis, eventum salutarem non fortuntur, sed ubi citra turbationes febris extraneas, sive a regime, sive a therapia præposta provenientes, ægi sub gravioribus symptomatis cardialgicis, convulsivis, lipothymicis, pulsuum debilitatoriis, decumbunt, aut moriuntur: cujus generis sunt ipsa pestis, & febres pestilentiales, nec non aliquando reliqua exanthematicæ & contagiosæ, præsertim si epidemica constitutio accedit.

Nec desunt ex intermitterebus, quæ, si ad anomalias varias, aut complicationes cum aliis accedant, eventum deleterium, licet rarius, post se trahunt, & malignitatis speciem, latiore tamen sensu sumunt, redolent.

## VIII.

## VIII.

*6. Ultimo tandem occurrit differentia febrium EPIDEMICARUM, & SPORADICARUM.*

## SCHOL.

Speciat hæc differentia ad invasionem febríum, quatenus individua pauca vel plura, uno eodemque tempore, ab una eademque febris specie, in uno vel pluribus locis, corripiuntur.

Epidemicæ enim dicuntur, quæ populariter, vel cum, vel sine contagio, multos homines uno eodemque modo & tempore, a causa universalí, tunc temporis in aëris peculiari constitutione querenda, afficiunt, atque invadunt, eademque methodo generaliore apud omnes, per certas secretiones & excretiones absolvuntur, eundemque generalē exitum, sine respectu evidentiore ad causas individuales, temperamenti, ætatis, diæta, vitæ generis, regiminis, morborum prægressorum, fortuntur.

Sporadicæ vero febres dicuntur, quæ hinc inde sub eodem quidem scheme plures personas, numero tamen longe minori, quam in casu priore invadunt, apud quas tamen generaliter iidem errores in diæta, viâ, vitæ genere, animi pathematibus, commissi, aut temperamento, humorumque constitutiones similes, ut causæ legitimæ antecedentes, accusari possunt.

## IX.

*De subjecto febrium, si questio formatur, generalissimum illud est genus humanum.*

## SCHOL.

De aliis enim animantibus non æque certum est, illa febricitare, nisi paucissima quædam exempla analogum quid exhibeant, quod tamen magis ad curiositatem observationis, quam ad scopum medicum primarium, qui cum corpore humano commercium habet, pertinet.

## X.

*Specialius subjectum illa constituunt individua, que indolis sunt activioris, & alacrioris, ad suscipiendum motus.*

*Coschowitzii Pathologia.*

CC

SCHOL.

## SCHOL.

Notissimum est, non omnes homines seorsim consideratos febribus laborare, quin potius magnus illorum numerus occurrat, qui per totam vitam ad senium usque, ne unica quidem febrium specie, multo minus diversis, pluribus, variisque decubuerunt aut laborarunt. Unde potius temperamenta cholERICA & sanguinea, præ reliquis prona existunt ad febres, cum utique specialis promptitudo ad motus exercendos in hoc negotio requiratur.

Nullatenus tamen reliqua temperamenta in totum excludimus a subiecto febrium, cum temperamenta puriora atque simplicia sint rariora, ideoque ex varia temperamentorum mixtura, dispositio aliqua concurrere possit, aut causæ individuales & occasioales aliquando aliiquid conferre soleant.

## XI.

*Præterea id certissimum manet, quod ad minimum non omnia temperamenta, neque omnes etates singulis febrium speciebus &que facile subjiciantur, sed certæ febres certis quoque familiares maneant temperamentis ac etatibus.*

## SCHOL.

Hoc intuitu videmus biliosas atque ardentes cholericis, benigniores acutas sanguineis, quartanas melancholicis principaliter familiares esse. Ex eodem fundamento etatis quoque diversitas considerationem subit, quod nempe juniores præ senibus facilius afficiantur febre, & si senes iisdem corripiantur, hi longe difficilius graviusque illis decumbant, imo haud raro sub intermittentibus simplicioribus plane succumbant.

## XII.

*Observarunt aliqui, quod etiam sexus sequior præ virili, in genere minus subjiciatur febribus.*

## SCHOL.

Id quod ex eodem fundamento minoris activitatis peritum esse videtur, nec generaliore considerationis dignitate caret, licet in hoc sexu merito temperamentorum quoque respectus sit habendus.

## XIII.

## XIII.

*Subiectum specialissimum febrium neque cor, aut alia corporis pars solida, neque sanguis aut alias humor, solitarie dici aut constitui potest.*

## SCHOL.

Motæ circa hanc rem quæstiones ortum duxisse videntur ex defectu veræ medicæ considerationis, verae formalitatis febris. Haud enim dici potest, quod sub febre, generaliter considerata, ulla corporis pars sit excepta ab universo negotio; cum enim totum negotium absolvatur motibus secretoriis & excretoriis, pro his absolvendis autem solidæ & fluidæ partes conspirare debeant, in genere etiam omnes hoc concurrere debent.

De reliquo tamen cor, tanquam primarium circulationis sanguinis instrumentum, & sanguis, ut humor universalissimus, omnium manifestissime motuum alterationes patiuntur, omnium sensus incurrentes, quas reliquæ minus manifestæ atque palpabiles in toto corpore organisque secretoriis & excretoriis sequuntur.

## XIV.

*Causa materialis, propter quam febris acceditur, est varia, pro diversitate speciei febrium.*

## SCHOL.

Crudior nempe materia & minus activa, in febribus chronicis ac intermittentibus: subtilior vero, magisque activa, imo aliquando agilissima, in acutis atque continuis: semper tamen ita comparata, ut praesentia illius, toti œconomiae animali, vel quoad partium solidarum texaturam, vel quoad fluidarum mixtionem, (quæ mixtionem solidarum simul pedissequam habet) vel quoad actionum vitalium, aut rationarium, turbationem, damnum aliquod notabile, aut sonticum atque funestum, vel proxime vel successive contrahere possit, ideoque naturæ estimationem legitimam mereatur.

## XV.

*Causa finalis febrium, est materiae morbificæ eliminatio, aut quantum naturæ vires permittunt, correctio, & preparatio,*

tio, ut œconomia animalis salva servetur, & mixtionis omnimoda turbatio avertatur & praecaveatur.

## SCHOL.

Hæc naturæ intentio, si obtinetur, effectum febrium eventumque salutarem comitem habet; sin minus, de naturæ insufficientia ad materiam præsentem, vel quantitate, vel qualitate ipsius motus superantem, aut turbatione in motibus salutariter susceptis, per animi pethemata, aut therapiam, amethodos institutam, testimonium affert.

## XVI.

*Causa efficiens est ipsa natura.*

## SCHOL.

Hæc enim, (prout in physiologicis jam demonstratum est) tanquam principium agens, vitæ & corporis proprii conservationi invigilans, motus illos secretorios & excretorios non modo pro rei necessitate extra ordinem auget, sed eò quoque dirigit, ut materia eliminanda ad debita excretionum organa perveniat. Ad quem actum exequendum instrumentum suppeditant variæ corporis partes solidæ fibroſæ molles, quippe quæ motibus exequendis aptissimæ sunt, quorum tamen motum fluidæ sequuntur, & ita cum illis conjunctim secretionibus & excretionibus inserviunt.

## Febres acutæ simplices ac benignæ. Febris Ephemera.

## I.

*Ephemera est febris acuta continens, unum solummodo diem durans, sine horrore febrii, cum astu præternaturali, capitis dolore, respiratione brevi & quasi oppressa, invadens atque ordinarie sudore largiore iterum intra nycthemerum transiens, post sanguinis orgasticam commotionem ortum capiens.*

## SCHOL.

## SCHOL.

Est itaque hæc omnium febrium brevissima species, & respectu periodi, quam servat, acutissima, præterea tamen, respectu eventus, minime funesta, sed levissima. Distinguit se se ab omni alia febre, solo hoc essentiali signo, quod unicum formet paroxysmum, non ultra 24. horas durantem, neque post illas recurrentem. Unde sub prima invasione certo pro tali declarari nequit, sed a posteriori demum agnoscitur.

Continens dicitur hæc febris, quoniam sub ipsius duratione atque decursu nulla alternatio, neque remissionis, neque intermissionis occurrit. Æstus de reliquo, licet præternaturalis existat, non tamen excessivus, aut cum aliis acutis facile aquiparandus est.

## II.

*Subjecta hujus febris ordinarie sunt individua juniora, & plethorica.*

## SCHOL.

Juniores enim personæ non modo ex naturalibus causis, alibi jam indigitatis, magis ad statum plethoricum dispositi sunt, sed sanguine quoque magis activo gaudent, ut ita, accedentibus causis occasionalibus, tanto facilius talis commotio oriri possit.

## III.

*Causa hujus febris materialis proxima est sanguis abundans, particulis sulphureis copiosis refertus.*

## SCHOL.

Cum enim ex historia morbi jam pateat, plethoricos potissimum subjectum ephemerae constituere, exinde facile ac tacite quasi patescit, quod abundans sanguis causam constitutam, non tamen sola mole physica peccans, sed ita dispositus, ut accidente causa alia, plethora quoque commota accedat: ita ut ab orgasmica & intestina sanguinis commotione localis ipsius motus etiam augeatur, & ita pulsus quoque mutationem subeat, quæ adeo usque increbescit, ut resolutio sanguinis in serum copiosum tenue sequatur, & ita natura sanguinem iub motu auctiore attenuatum, sudeore largiore excernat, atque mediate imminuat.

## IV.

*Causa occasionalis proxima ordinarie est externa.*

SCHOL.

Hinc utplurimum observatur, quod hæc febris ordinarie sequatur vel corporis universaliores motus exagitatorios, præcipue sub calida tempestate suscepitos, & ultra modum continuatos, cursorios videlicet, saltatorios, aliasve: vel particulares, solius quasi sanguinis commotiones gastricas, ab aëre calidore excitatas; unde haud raro accedit, hanc febrem excitari a graviore solis æstu, vel totum corpus, vel specialiter nudum caput feriente.

## V.

*Remotiores ex hac causarum classe possunt solentque esse errores diætетici, brevi tempore ante accessum commissi.*

SCHOL.

Hoc respectu potissimum accusari meretur tam diæta vinoſa spirituosa calida, diutius jam usurpata: in specie potuum spirituosorum, inebriativorum ac vinosorum, immediate & proxime facta ingurgitatio.

## Synochus simplex.

## VI.

*Synochus simplex est febris acuta continens, summo mane utplurimum ægrorantes invadens, sine horrore antecedente perceptibili, cum æstu insigni, sine remissione fere æqualiter usque ad finem totius periodi continuante: ordinarie ad primum septenarium excurrens, tuncque critica hemorrhagia, vel critico sudore cessans.*

SCHOL.

Quamvis hæc febris non sub primo statim initio ad summum devient gradum, sed aliquo modo successively incrementum capiat suum, nihilominus tamen continentia typi se in eo manifestat, quod nullam vel remissionem vel intermissionem paroxysmorum formet, sed æqualiter quasi procedat, donec impetrato fine, quem natura intenderat, iterum æqualiter cesseret transeatque.

Est

Est autem ille finis hujus febris, ut sanguinis quantitas simpliciter imminuatur; quapropter tacite quasi haec febris incipit, sine prægresso notabili horrore aut frigore, cum ad solam resolutionem sanguinis in serum, aut evacuationem ipsius sinceram, non aequa necessarium sit, ut interna organa colatoria expandantur, aut dilatentur, sed dictus effectus celeriore fortioreque transpulsu per partes spongiosas facile absolvitur queat. Qui effectus imminutorius ordinarie circa dies criticos, vel hemorrhagia largiore, vel largissimi sudoris profusione, vel per utramque fese manifestat, febrique terminum ponit.

## VII.

*Differt haec febris aliquando gradu non modo impetus, sed etiam temporis durationis atque effectus.*

## SCHOL.

Quando enim causa levior, aut quantitate minor adest, tunc aliquando contingit, ut gradus febris sit lenior, atque periodus brevior existat, unde in tali casu ad quartum usque diem saltet extenditur, & multoties solo sudore largiore, instar ephemerae terminatur, atque finitur. Quam ob rationem quoque nos ephemerae plurium dierum nullam injecimus mentionem, cum haec determinatio aliquam contradictionem involvat, ideoque rectius statuendum esse putemus, eam febrim, quam medici alias hoc titulo insignire solent, synochum leviorem esse.

## VIII.

*Subjectum hujus febris constituunt & juniores, & eximi plethorici, presertim cholericci, & cholericoco-sanguinei.*

## SCHOL.

Juniora enim corpora ad generationem multi sanguinis sunt aptiora, quoniam ut plurimum non modo voraciora existunt, sed facili quoque negotio, respectu aliarum commotionum corporis & sanguinis, excedunt. Cholericci vero, & cholericoco-sanguinei præ aliis sanguine gaudent particulis sulphureis copiose referto, ideoque mobiliore & agiliore, nec non majore ad suscipiendos motus, quoad partes solidas, promptitudine. Hinc tales febres sub temperamenti, ætatis, & plethorae concurso tanto facilius excitantur.

## IX.

## IX.

*Causa materialis proxima atque primaria est sanguis, quantitate excessiva peccans.*

## SCHOL.

Hæc enim sanguinis abundantia, physica sua mole peccans, molesta existit viis, per quas sanguis moveri debet, eas infarciendo, distendendo, prægravando, quo ipso partim progressus sanguinis liberior successu temporis impeditur, partim diversis craseos læsionibus ansa præbetur: unde necessitas naturalis postulat, ut ipsius imminutione adæquata ac tempestiva, ejusmodi sanitatis damna præoccupentur.

## X.

*Remotiores antecedentes causa petenda sunt a vitiis diætae & generis vita.*

## SCHOL.

Cum itaque notissimum sit, plethoricum statum ortum capere ac incrementum ex diæta plena, lauta, vitæque genere otioso, prout hoc sub cap. de plethora fusius explicavimus, hic crambem semel adpositam non recoquimus, sed causas, ibi propositas, tanquam generaliores & remotiores hue quoque applicamus.

## XI.

*Occasionales commotionis febrilis causa proximiores sunt ordinarie, vel excessus inebriativi, vel motus corporis exstrematuri nimii, vel graviora animi pathemata iracunda.*

## SCHOL.

Ab his enim omnibus orgastica sanguinis commotio atque expansio producitur, quæ plethoram, physice peccantem, naturæ magis molestam reddit, hancque excitat, ut contra materiam hanc, corpori molestam, motibus extraordinariis insurgat, eosque tamdiu continuet, donec materiam illam ex parte imminuerit, & evacuaverit.

**Synochus putrida.**

## XII.

*Synochus putrida est febris acuta continens, malignitatem compli-*

*ue primaria sanguinis.*  
hyphica sua mole peccata, n  
er, eas infarciendo, diffundendo,  
sanguinis liberor succedit.  
s lectionibus anla prebeat: u  
nitio adequa ac temp  
tura.

complicatam habens ex causa aliena, sanguini inherente, a natura tam pro imminuendo & resolvendo sanguine abundante, quam pro excernenda malignitatis causa, suscepta, sine omni remissione, ab initio ad solutionem usque decurrentis.

## SCHOL.

Quemadmodum vox synochi in genere significat, secundum Galenum, febris continua talem speciem, quæ nullis plane distincta est accessionibus aut reduplicationibus: & sub antecedente titulo synocha simplex pertractata fuit, ita in præsenti composita quasi febris indigitatur, ab illa in tantum distincta, quod non equidem ratione typi, sed potius ratione indolis composita adpareat.

Typus enim in utraque febre idem est, uti veteres scriptores, in quorum monumentis potissimum hujus febris mentionem factam esse scimus, testantur, qua de re & Sennertus, & Riverius, aliqui legi merentur: causa autem materialis duplex videtur, quarum altera benigna est, altera vero malignitatem spirat, ita ut hæc febris quasi ex benigna & maligna composita dici possit.

Unde authores quoque pro demonstratione ejusdem, utriusque febris, typi, eandem quoque utrique tribuunt atque adscribunt divisionem, in *acmaesticam*, quando eodem vigore quo cœpit, nec invalescendo, nec decrescendo æqualiter progreditur: *epacmaesticam*, si gradu semper augetur, & de horis in horas æqualiter citra omnem remissionem increbescit: & *paracmaesticam*, quando equidem sine intermissione & remissione æqualiter ad statum usque continuatur, sed paulatim de die in diem decrescendo decurrit.

## XIII.

*Differt hæc febris a precedente tam gradu, quam duratione.*

## SCHOL.

Cum enim duplex hic subsit causa, majorque labor requiratur, omnia febrilia symptomata, & ipse gradus febris, majorem exacerbationem præ se ferunt, quam in synocho simplici, nec minus tota febris longiore decursum servat, & ad plures septenarios facile durat, cum simplex ut plurimum uno septenario absolvatur: facilis enim utique est, ut sub motu illo sanguinis auctiore, sanguis simpliciter vasa per rumpat, ac haemorrhagia excernatur, aut attritione valida per partes spon-

*Celschitzii Pathologia.*

D d

giosas

giosas in serum tenue dissolvatur, quam ut materia illa sulphurea atque subtilis, colatoriorum poros facile effugiens, simul secernatur, & excernatur.

## XIV.

*Subjecta bujus febris p̄e aliis sunt juniores, pletorici & cholericī; peculiari precipue sanguinis discrasia laborantes.*

SCHOL.

Juniores enim p̄e aliis ut plurimum magis ad plethoram sunt dispositi: plethora autem primarium hujus febris constituit fomitem, & ex temperamento major accedit discrasia sanguinis sulphurea, majorque ad motus activitas, unde major etiam febris exacerbatio, quoad gradum & moram, ortum capere potest.

## XV.

*Causa hujus febris materialis proxima & primaria, eadem est, quam in precedente designavimus.*

SCHOL.

Sanguis nempe excessiva quantitate peccans, nunc specialiter & extra ordinem intestine commotus, qui ad productionem febris synochæ, qua talis, sufficere potest.

## XVI.

*Quod autem putrida inde synochus evadat, causa specialis est querenda in discrasia sanguinis conjuncta, humorum temperatam & naturalem miscelam iadente.*

SCHOL.

Hæc ordinarie esse solet discrasia sanguinis valde sulphurea, acris ita, ut ab illius præsentia sanguis quantitate peccans, simul valde tenuis, acutus, expansus & mobilis evadat, & intestino motu p. n. æcto, ad dissolutionem properante, agitetur: unde sub hac febre non sola sanguinis imminutio, sed simul hujus materiae sulphureæ secretio & excretio a natura intenditur. Neque diffitemur, quod aliquando speciale quoddam miasma ex aëre attractum, subtile, activum, fermentescibile, ad massam sanguineam accedens, eundem effectum producere possit.

## XVII.

*Occasionales causæ proximiores eadem sunt cum illis, quas pre-*

precedenti febri assignavimus; quibus præterea sanguinearum evacuationum naturalium suppressiones, aut artificialium neglegtiones, adjungimus.

## Febris catarrhalis benigna.

### XVIII.

*Febris catarrhalis benigna est febris continua, utplurimum vere vel autumno, horis vespertinis, cum horrore agros invadens, quem astus febrilis excipit satis tolerabilis: sub quotidianis remissionibus, novisque exacerbationibus vespertino tempore recurrentibus, decurrens, ad unum alterumve septemvarium excurrens; causamque seroso-lymphalem agnoscens.*

#### SCHOL.

Distinguit se hæc febris a continentibus per remissionem paroxysmorum quotidiam notabilem, & exacerbationem paroxysmorum sine frigore intercedentे novo, tanquam omnium continuarum criterio communi. Benignitatem vero suam declarat lenitate febris, atque symptomatum febrilium, nec non eventu ordinarie salutari ac minus funesto.

Ordinarie hæc febris tempora vernalia & autumnalia servat, cum his anni temporibus secretiones & excretiones periphericæ facilius aliquod patientur damnum, ac impuritates seroſæ inde augeantur.

Periodus hujus febris non semper est eadem, dum aliquando ad primum, aliquando ad secundum septenarium durat, prout nempe causa materialis multitudo, aut minor dispositio brevius aut longius tempus pro sui excretione poscit.

### XIX.

*Differt hac febris tam a quotidiana continua, quam a catarrhali maligna.*

#### SCHOL.

Ab illa respectu typi, ratione cuius hæc nostra simplex, illa vero composita existit, & per quotidianos frigoris intercedentis recursus

agnoscitur. Ab hac, respectu causæ, symptomatum, atque eventus. Causa enim in nostra benigna febri est mitior, lenior, neque malignitatem spirat, cum in illa materia peccans sit acrior, subtilior, corruptionem majorem minitans: ideoque symptomata graviora, majusque periculum producens.

## XX.

*Subjectum hujus febris primario constituant tempera-  
menta phlegmatico-sanguinea, aut sanguineo-phlegmatica.*

## SCHOL.

In his enim præ aliis major semper adparatus præsto est materia peccantis seroso-lymphalis, ad catarrhos, & catarrhales affectus in genere disponens: tenerior quoque adest corporis habitus, qui facili negotio ab aëris injuriis externis alteratur. De reliquo tamen alia quoque temperamenta non penitus ab illius invasione excluduntur, si nempe per causarum externalium occasionalium vehementiorem accessum, ordinariarum serosarum excretionum repentinam aut vehementem alterationem, turbationem, aut suppressionem patientur.

## XXI.

*Causam materialem proximam constituit humor seroso-  
lymphalis mucidus, in massa sanguinea, aut circa nobilem ali-  
quam partem, hærens, ex illis secernendus ac excernendus.*

## SCHOL.

Licet enim ex aliqua parte plethoram quoque accusare liceat ut causam febris generaliorem, tamen hæc febris, qua catarrhalis, causam agnoscit principaliter seroso-lymphalem, mucidam, falsam, quæ discribam in sanguine constituit, suique tempestivam emotionem urget: quæ, cum non semper ejus sit conditionis, ut motibus ordinariis & quotidianis, tam propter quantitatem excedentem, quam ob spissitudinem, minorinemque mobilitatem, obtemperare possit, in causa est, ut propter illam majores & extraordinarios natura suscipiat motus, pro abstergenda illa & educenda.

Nec

Nec tamen semper & solitarie hæc materia hæret in sanguinea massâ, sed aliquando infarctum constituit in pectoro, aut capite, & gravedinosa, aut tuficulosa symptomata producit, quæ motus febriles excipiunt. Cum autem hæc materia minus activa atque subtilis existat, febris quoque le-nor esse solet, ita ut ante diem undecimum aut decimum quartum raro discedat.

## XXII.

*Causa antecedens querenda est in impuritatum seroso mu-sidarum & salinarum impedita secretione & excretione.*

## SCHOL.

Quodsi enim hæc impuritates semper in sufficiente quantitate, debitoque ordine, prompte excernantur, illarum copia in corpore crescere non potest: cum autem variis ex causis hæc secretio & eliminatio susflamnetur, non potest non fieri, quin augeantur, aut in certis corporis locis accumulentur, ibique incommoda producant, & sui vegetiorem detrusio-nem poscant, quæ motibus his febrilibus, a natura susceptis, absolvitur.

## XXIII.

*Cause occasioneis ordinarie sunt excretionum serosarum suppressiones repentinae & pertinaciores.*

## SCHOL.

Hinc videmus, proxime hanc febrem sèpissime excipere coryzam repente suppressam, sudores largiores repente cohibitos: aut supervenire infarctibus catarrhalibus pectoris, qui ad aliqualem jam excretionem pervenerant, nunc autem impeditiore successu laborant.

Nec minus scabies retropulsâ primam sèpissime huic febri ansam præbet, aut tinea capitis & achores in ætate infantili & puerili, si forsan vel refrigeratione externa, vel intempestiva medicatione, per varia unguenta retrocesserint. Quando enim sudoris repentinae contingunt suppressiones, præcipue corpore prius exæstuato, aut sudores quoque starii annui quasi critici emanent, tunc sub plus quam tonica externæ peripheriæ strictura serum ad glandulas subcutaneas pro excretione jam dela-

delatum, aut proxime deferendum, ad interiora retropellitur, partesque salinæ, mucidae, sulphureæ, sanguini iterum admiscentur.

Id quod simili modo contingit ab exanthematum supra nominatorum retrocessione, ut hæc materia postmodum sub auctioribus motibus, propter plethoram, & hanc materiam nocivam a natura susceptis, trachū plurium dierum excernatur.

## Febris cholerica.

### XXIV.

*Febris cholerica aut biliosa est febris acuta continua, cum horrore incipiens, quem æstu insignis sequitur, tempora exacerbationis ordinarie summo mane servans, evacuationes biliosas comites habens, ad inflammatoriarum speciem pertinens, symptomatibusque gravioribus stipata, ac periculosa.*

### SCHOL.

Quod hæc febris sit continua, elucet ex permutatione exacerbationis paroxysmorum, nulla intercedente intermissione, sed solum aliqua remissione, quæ tamen satis brevis esse solet.

Evacuationes biliosæ huic febri familiares sunt aliquando anotericæ solum per vomitus biliosos, aliquando catothericæ solum per diarrhoeas ejusdem indolis concurrentes. Quodsi autem utriusque generis evacuationes simul contingent, & valide succedant, cholerae morbi titulus huic febri specialiter tribuitur: quæ evacuationes, si promte ac tempestive succedant, bonum eventum promittunt: sicut nimis tarde aut parce succedentes, funestum magis exitum arguunt. Ad inflammatoriarum speciem hanc febrem pertinere, ideo declaramus, quod partim causa materialis ad inflammationes producendas aptissima sit, partim horripilations sapissime sub leviore corporis motitatione recurrentes, (alias febribus inflammatoriis quasi propriæ) hic etiam utplurimum concurrent, partim quod post mortem, si cadavera aperiantur, intestina aut ventriculus inflammata ac sphacelata deprehendantur.

Gravitatem & periculum hujus febris declarant symptomata graviora, sub æstu vehementi, siti intolerabili, maximis capitibus doloribus,

præ-

præcordiorum anxietate cardialgica, vomitibus, diarrhœis, somni defectu, deliriis accendentibus: quæ tamen pro differentia gravitatis causæ quoque differre solent.

## XXV.

*Subjectum generale præ aliis constituunt cholericæ, & chole-*  
*rico-sanguinei, precipue juniores.*

## SCHOL.

Hi enim particulas sulphureo-salinas, pro copiosa bilis generatione idoneas, abundanter in sanguine fovent, & præ aliis facilime tam ad iracundiam vehementiorem, quam ad motuum vehementiorum susceptiōnem proniores ac promptiores existunt, nec non respective plethoricum statum fovent.

## XXVI.

*Subjectum speciale est vel ventriculus, vel duodenum, vel*  
*intestina reliqua tenuia.*

## SCHOL.

Non quidem hic statim, dictas partes tanquam subjectum ipsius febris in se spectatae, sed potius lœsionis, a causa materiali proxima induitæ, quam aliquando ventriculus solus, aliquando duodenum, aliquando pars utraque, neque exceptis reliquis intestinis tenuibus, patiuntur, prout nempe in una aut altera illarum fixiore formaverit sedem.

## XXVII.

*Causam proxime antecedentem, eamque continentem hujus febris, ponimus in leviore tunicae interioris dictarum partium phlogosi, aut inflammatione superficiali.*

## SCHOL.

Testantur hoc symptomata ardoris & sensus molesti cardialgici circa interiora, cum faucium ariditate, & siti intensa, nec non deliriis.

## XXVIII.

*Causa materialis proxima antecedens est bilis in ventri-*  
*culum aut intestina effusa, & tunicae interioris substantia po-*  
*rosa se se insinuans, nerveamque sensu molesto afficiens.*

## SCHOL.

## SCHOL.

Hanc causam materialem præsto esse, nullum restat dubium, cum de illius præsentia immediata testentur biliosæ evacuationes, per superiora aut inferiora contingentes: ita tamen, ut in hac febre non adeo magna adsit bilis acrimonia caustica: aut alia materia simul in canali illo membranaceo præsens, acrimoniam bilis obtundens ac involvens, promtamque substantiæ membranosæ aggressionem impediens.

## XXIX.

*Causa occasionalis proxima ordinarie est vebemens iracundia, vel sub ciborum ingestione, vel proxime post illam, ante plenariam illorum digestionem, perpessa.*

## SCHOL.

Bilis enim tunc temporis in ventriculum & duodenum effusa, naturalem quidem possidet suum acorem, sed citius involvitur cibis, quam ad ipsam dictorum viscerum substantiam pertingit, & quamvis levior aliqua ipsius portio eò pertingat, hæc tamen superficialiter magis substantiam membranosam afficit, eamque magis exstimulat, ut motus excretorii promtius inde sequantur: ita ut causa materialis effectus minus caustici & inflammatorii in hac febre sit præsentia ciborum ac potuum, bilis acredinem involventium, atque læsionem continuitatis impedientium.

E quibus ita positis ac consideratis, facile quoque elucescit causa & nexus symptomatum essentialium, hanc febrem comitantium. Quemadmodum enim bilis in qualitate & quantitate naturali ad duodenum delata, semper stimulum quotidianum pro excretione alvina præbet, ita maiore quantitate effusa, qualitatem tamen naturalem retinens, leviterque membranam nerveam afficiens & vellicans, motus in illa excitat træctrios & spasticos, unde motus peristalticus augetur, &, si ordinem ad inferiora servat, diarrhœam biliosam, si ordine inverso procedit, bilem versus pylorum & ventriculum propellit, vomitusque biliosos producit. Quodsi autem motus peristalticus modo sursum, modo deorsum vergat, (id quod ut plurimum a copia bilis dependere solet) utraque excretione vegete procedere potest, & in morbo cholera procedere solet.

Febris

---

## Febris biliosa ardens, seu causus.

### XXX.

*Causus est febris acuta continua inflammatoria gravissima, a bilis acrioris in primis viis effusione ac detentio ortum ducens, nullas evacuationes biliosas comites habens, gravissimis symptomatibus gravissimoque periculo stipata.*

### SCHOL.

Causus, sive ardens hæc febris, dicitur a summo æstus febrilis gradu, horrorem antecedentem excipiente, & coniuncto ardoris molestissimo sensu in partibus interioribus, unde gravissimam febrium biliosarum speciem constituit. Convenit cum præcedente ratione typi, dum similiter continua existit: ratione causæ generalioris, cum æque ac illa bilem causam materialem agnoscat. Differt autem ab illa gravitate symptomatum, quæ a gravitate causæ, tam continentis, quam materialis antecedentis, dependet: & ut plurimum eventum funestum atque lethiferum comitem habet. Specialiter autem ab illa differt evacuationum biliosarum suppressione, dum bilis neque sursum, neque deorsum in hac febre ejicitur, sed pertinacius in primis viis incarcerata detinetur.

Inflammatoriam hanc febrem vocamus easdem ob rationes, quas sub antecedente titulo adduximus: acuta vero summo jure dicitur, cum ægrotantes non solum acute invadat, sed acute quoque jugalet, iisque sepe die quarto moriantur, ac raro septimum attingant diem.

### XXXI.

*Subjectum generale hujus febris constituunt personæ plethorica & temperamenti cholericæ, vel cholericæ-melancholici.*

### SCHOL.

Quantum plethora & temperamentum cholericum ad febrem biliosam in genere contribuant, sub præcedente titulo jam dictum est: unde nunc tantum addimus, cholericos ad spasmos quoque proniores esse,

*Coschwitzii Pathologia.*

E e

esse, & que ac melancholicos: atque ex hoc fundamento potissimum deducendas esse evacuationum biliosarum pertinaciores suppressiones, quæ tanto promptius succedunt, si ambo temperamenta simul concurrant.

## XXXII.

*Subjectum speciale idem existit, quod in antecedente febre declaravimus.*

## XXXIII.

*Causa proxime antecedens & continens est actualis dictarum partium arroso, & profunda inflammatio.*

## SCHOL.

Hac ex causa occurrit prima inter hanc & præcedentem febrem differentia: sicut enim in illa levior & superficialis inflammatio & phlogosis occurrit, ita in hac actualis lœsio continuitatis præsto est: que, cum in partibus nobilioribus, & maxime sensibilibus sedem habeat, in causa est, ut major deinde sequatur sanguinis affluxus, ejusque, ob continuitatis lœsionem, extravasatio & stasis, quæ ab acrimonia bilis acida in coagulationem, & facillimo negotio in corruptionem sphacelosam ruit.

## XXXIV.

*Causa materialis antecedens proxima est bilis acris & caustica, in ventriculo aut intestinorum tenuium canali hærens.*

## SCHOL.

Diximus in præcedente titulo, bilem in intestina ultra modum effusam, esse causam materialem proximam febris cholericæ, sine notabili respectu ad ejus acrimoniæ. In causo autem adeo longe major, & consideratione digna acrimonia acida & caustica corrosiva, minor vero materia ipsius effectum corrosivum impedientis præsentia, quin potius talis materia accedat in loco lœsionis, quæ acorem bilis adhuc maiorem reddere valet.

Id quod satis manifeste concludere licet e diverso invadendi modo; causus enim producitur, quando ægri ira excanduerunt vehementissima post ciborum ingestorum concoctionem, multo magis post illorum distributionem, & vacuis quasi existentibus intestinis.

Hic

Hic enim bilis effusa, vel per se acrior, substantiam ventriculi aut intestinorum promte & sine impedimento aggreditur, cum nulla in illis præsto sit materia, cui involvi possit, vel reliquiis ciborum potuumque acescentibus permiscetur, acoremque majorem contrahit acidum corrosivum, idque tanto facilius, tantoque gravius, quo magis cibi potusque ingesti fermentativæ & acescentis indolis extitere.

## XXXV.

*Causæ occasioales proximiores hujus febris sunt iracundæ commotiones animi gravissimæ, post ciborum concoctionem per-  
fessa: & errores dietetici aliquando simul commissi.*

## SCHOL.

Quodsi enim tunc temporis bilis in duodenum effundatur, quando a chymosa & chylosa materia liberum & vacuum existit, materia biliosa acrior & caustica tanto promptius substantiam intestinalem aggreditur, eique læsionem continuitatis assert. Ex altera parte suum quoque conferunt symbolum cibi aut potus fermentativi proxime assumti, ex fructibus horætis, vinis dulcibus, aut cerevisiis valde fermentescilibus, ad acorem pronis. Horum enim reliquæ, si cum bile convenient, acidam ejus acrimoniam adaugent, eamque penitus corrosivam reddunt, ut instar summi caustici substantiam intestinalem arrodere possit. His non immerito quoque adnumeramus corporis perfrigerationes, post prægressus ejus exæstuationes forsitan perpeccas, quippe quæ stricturis spasti-  
cis, detentioni materiae biliosæ tanto majorem ansam præbent.

## Febris scarlatina.

## XXXVI.

*Febris scarlatina est febris acuta continua, exanthema-  
tica benigna, a colore scarlatino, quo totum corpus perfundi-  
tur externum, nomen gerens, horrore febrili invadens, sub  
æstu continuo, ad unum septenarium decurrens, & post ardo-  
rem in cute cessantem, squammulas tenuissimas furfuraceas*

cedentes relinquens, a sanguinis abundantia & aliquali acrimonia ortum trahens.

## SCHOL.

Decimus, hanc febrem acutam atque continuam esse, dum ad modum acutarum & continuarum, impetu satis vegeto, licet non enormi, decursum suum brevi spatio unius septenarii, imo aliquando semi-septenarii absolvit, nullasque paroxysmorum intermissiones format, sed jugi continuitate, intercedente saltem remissione, decurrit.

Exanthematica autem dicitur, quoniam sub hac febre excretio quedam peripherica contingit in superficie cutis, post cujus efflorescentiam, per aliquot dies continuatam, febris remittit atque cessat. Exserit sepe haec excretio non equidem per distincta quedam exanthemata pustularia, aut maculosa, sed rubore intenso æqualiter diffuso, tam per totam faciem, quam per reliquam corporis peripheriam, cum aliquali habitus externi turgescientia æquabili, & ardore quasi pruriginoso.

Benignam hanc febrem declaramus, quoniam symptomatis, malignitatem testantibus, ordinarie haud stipata existit, nec ægrotantes hac febre succumbunt.

## XXXVII.

*Subjectum bujus febris constituunt persona plethorica, temperamenti sanguinei, aut sanguineo-cholerici, & etatis puerilis, aut primæ juvenilis.*

## SCHOL.

In hac enim potissimum viget status plethoricus, & sanguis floridior existit, qui ad commotiones orgasticas, atque febiles pronior est, præcipue si temperamentum cholericum concurrat, quippe quod particulis sulphureis ac agilibus in sanguine magis abundat.

Nec minus dispositio habitus corporis hic multum contribuit: cum enim sanguinis tenuitas, & partium spongiosarum mollities & laxitas inter se conspirent, tanto facilius contingit, ut sub accedente motu febri, sanguis quasi universaliter ad peripheriam pellatur, & cum san-

guine

guine simul subtilior salino-sulphurea impuritas advehatur, quo tanto promitus per poros cutaneos sub motu illo jugiter continuato transpirare & exhalare possit.

## XXXVIII.

*Causa materialis proxima esse videtur sanguis, partim quantitate abundante in genere peccans: partim in specie nimis tenuis; & leviore acrimonia sulphurea aut salina imbutus.*

## SCHOL.

Id quod adparet, tam ex subjectis plethoricis, quam ex ardore, summoque rubore, quo pannum scarlatinum cutis æmulatur, & denique ex ipso effectu ultimo, quo febris & efflorescentia peripherica tandem transpiratione paulo largiore, aut in maxime adsuetis hæmorrhagia narium critica terminatur, & sub illa auctiore transpiratione cuticulam quasi in furfures leniores solvit, ejusque secessionem relinquit.

## XXXIX.

*Causam remotiorem antecedentem constitunt omnia, que partim plethoram augere, partim eandem commovere, partim denique impuritates salinas sulphureas augere possunt.*

## SCHOL.

Referimus itaque ad hanc classem causarum errores diæteticos, circa ejus plenitudinem lautamque indolem commissos: sanguinis exæstuationes, tam a potibus calidioribus, quam a motibus corporis exagitatoriis, & aëris externi calore dependentes: hæmorrhagicarum excretionum adsuetarum suppressiones; unde videmus, illa subjecta potissimum hac febre coripi, quibus in prima ætate narium hæmorrhagia emansere, aut in sexu foemino menses suppressi fuere.

## Febris papularis.

## XL.

*Febris papularis, qua ab aliis quoque purpura urticata vocatur, est species febris acutæ atque benignæ exanthematicæ,*

*a sanguinis commotione extraordinaria oriens, exanthemata papularia (quasi cutis utrica tacta fuerit) cum ardore & pruritu summo, formans.*

## SCHOL.

Acutam vocamus hanc febrem, quoniam acutarum modo ægros invadit horrore, leni quidem, quem æstus excipit, cum capitis gravativo dolore, ac inopinata faciei ac peripheriæ corporis intumescentia, & brevi satis periodo etiam decurrit: dum ultra quatuor dies raro durat, frequentius vero breviori adhuc tempore decursum suum absolvit.

Febrim ipsam quod attinet, ordinarie illa ita levis & brevis existit, ut fere nomen febris non mereatur, cum ut plurimum totus affectus paucis horis, sex nempe aut duodecim, absolvatur. Interim, cum aliquando contingat, ut febrilem typum affectus assumat, & aliquot paroxysmis repetitis recurrit, quos tunc quotidie servare solet, & per tres quatuorve dies continuare, ad febrium classem relatus est, de qua tamen dicere fas est, quod ratione typi vaga vocari mereatur.

Benignam vocamus, quoniam ordinarie adeo benigna est, ut ægri orthostadii, ad minimum per intervalla, esse possint, neque unquam sere sub illa moriantur, licet hoc non negandum sit, quod, sub frivole admisis refrigerationibus, anxietates præcordiorum pariat. Interim Nenterus hanc febrim, se aliquando & epidemicam, & malignam observasse, notavit: id quod propria observatione haec tenus confirmare non possumus, interea tamen observationis veritati quidquam detrahere nolumus, cum in specie epidemicæ constitutionis concurrentis mentionem faciat, ubi tamen negare non possumus, ex ipsa relatione historica probabiliter concludendum esse, hanc febrem magis inflammatoriam fuisse, exanthematum autem illorum concursum magis pro accidentalis, quam essentiali, habendum esse.

Exanthematica hæc febris audit, quoniam sub hoc affectu, exanthemata, in cute adparentia, adspicui se fistunt, in forma tuberculorum, aut etiam vibicum, longiorum ac latarum, indistinctæ magnitudinis, coloris pallidioris, interstitiis tamen depresso rubentibus, pruritum ac ardorem inferentia, quasi urtica recente corpus tactum fuerit.

## XL I.

*Subjecta huic febri obnoxia sunt itidem corpora plethorica, & præ aliis juniora.*

## SCHOL.

Quamvis quidem juniores ut plurimum huic affectui subjiciantur, nihilominus etiam haud raro pro vetioris ætatis personæ, & plethoricæ fuerint, hac febre corripiuntur, præcipue habitum corporis possidentes inter laxiorem & strictiorem quasi intermedium, qualis sanguineo-cholericonum, & sanguineo-melancholicorum est. In his enim sanguis satis adhuc tenuis est, ut in partes spongiosas impelli possit, cum tamen aliqua dispositio major in his temperamentis occurrat, ad spasticas constrictiones subeundas, hinc facilius vibices illæ, tanquam particularis stricturæ intercurrentis indicia ortum trahunt. Quod enim exanthemata elevata distincta, modo majora, modo minora formet, id dependere existimamus a motu partium solidarum quasi mixto: dum nempe ab interioribus sanguis movetur ad exteriores, in his autem spastica stritura intercurrentis, non tamen æqualis, nec fortior concurrit, ita, ut quædam cutis exterioris fibræ relaxatae, aliae vero strictæ existant, quarum illæ elevationes ac vibices concedunt, hæ vero depresso spatia formant.

## XL II.

*Causam materialem hujus febris eandem agnoscimus in genere, quam in priore accusavimus, quantitate tamen & gradu minorem ac leviorem.*

## SCHOL.

Id ipsum docet subjectorum conditio, quæ tam de sanguinis abundantia, quam de ipsius aliquali discrasia sulphurea testantur.

## XL III.

*Neque alias accusare possumus causas occasioales, quam que sub precedente febre indigitæ fuerunt.*

Febres

## Febres contagiosæ & malignæ.

### I.

*Febres contagiosa & maligna sunt febres acuta & continua, que vel ex epidemica aëris constitutione populariter grassantur, vel ex specialissima materia peccantis indole, gravioribus, ac ut plurimum lethalibus symptomatibus, citra respectum individualis dispositionis concurrentis stipata, & propter materiam, putridam corruptionem minitantem, suscepta sunt, ac facile, imo ordinarie, per contagium vel universale vel particulare, aliis subjectis communicantur.*

### SCHOL.

Acutas & continuas has febres esse, asserimus, quoniam ex morborum historia notissimum est, chronicas & intermittentes febres, neque malignitatem, neque contagium, (quod tamen præcipuum malignitatis febrilis indicium est) comitem habere: quamvis enim a quibusdam intermittentibus quoque aliqualis malignitas adscribatur, id tamen sensu saltim latissimo applicari potest, & potius de harum febrium anomalia, quam de vera illarum malignitate dici debet. Licet enim intermittentes særissime epidemicæ sint, & populariter grassentur, sola tamen epidemia non malignitatem testatur, sed hujus præsentia partim ex contagio, partim ex gravissimorum symptomatum concursu ac deleterio, in putredinosam corruptionem tendente, eventu communiore præsumitur.

Sunt autem symptomata, febris malignitatem declarantia, varia, satisque multa, quorum non omnia semper in omnibus subjectis, sed in aliis pauciora, in aliis plura, occurrunt, eoque ipso majorem minorrem malignitatis gradum declarant. E quibus tamen maxime præludent virium prostratio insignis, in primo statim morbi initio, citra causas manifestas occurrens: Vigiliae pertinaces, atque hinc deliria graviora: variæ excretiones, præsertim sibi invicem contrariantes: pulsus debilitas & inæqualitas: lipothymia: convulsiones: insensibilitas citra cessu-

cessaria, ita ut ægrotantes sub æstus exacerbatione neque sitim, neque capitis dolores, vel quocunque tempore, neque excretiones ordinarias advertant.

Affectus soporosi & comatosi: plurium exanthematum, specie diversorum, concursus: exanthematum, licet ordinariorum, vel præmatura & impetuosa eruptio, vel minus constans duratio, aut facilis ac vaga retrocessio: sub quibus omnibus præcordiorum anxietates, animi desperabunda dejectio, & rerum alias æstimatione notabili prosecutrum inadvertentia & neglectio, concurrere solent, nec minus secretorum & excretionum debitatarum defectum junctum habere.

## II.

*Febres contagiosæ semper sunt malignæ.*

SCHOL.

Cum enim ipsum contagium ad principaliora malignitatis febrilis signa referatur, nullum restat dubium, semper malignitatem adesse, ubicunque contagiosa febris indeoles animadvertisse.

## III.

*Febres malignæ non semper sunt contagiosæ.*

SCHOL.

Notandum est merito de hisce febribus, quod equidem valde frequenter, verum tamen non semper, & pari respectu sibi invicem jungantur atque concurrant.

Malignitatis enim causæ alio tempore esse possunt universaliores atque communes, in ipsa causa materiali proxima totius febris hærentes, tunc quoque contagium causantes, quæ alio tempore plane individuales sunt, & a particulari humorum discribantur, ejusque cum illa causa universaliore concursu, dependent.

Unde e.g. febris catarrhalis, quæ sporadicæ aliquando grassatur, & toto genere benigna existit in plurimis subjectis, hoc non obstante, eodem tempore certo individuo uni aut alteri, maligna ac deleteria esse potest, ob specialem hujus individui dispositionem cacoehymicam, aliisque morbosam in corpore ante accessum febris præexistentem, & neque per contagium allata, neque per contagium ulterius propagata observatur.

*Coschowitzii Pathologia.*

F f

IV.

## IV.

*Differunt hæ febres malignæ inter se notabiliter gradu malignitatis.*

## SCHOL.

Aliæ enim harum febrium ab essentia sua malignæ dici merentur, quippe quæ ex sua essentia, semper & sine exceptione malignitatem suam declarant, quotiescumque occurrunt: ad quarum classem merito pestem, febresque pestilentiales, & post has, petechiam veram referimus: de quibus notorium est, quod non modo gravissimis symptomatibus malignitatem testantibus, sed maxime quoque funesto & deleterio eventu in quamplurimis personis indolem suam prodant.

Aliæ vero mitioris indolis existunt, ita ut de illis statuere fas sit, quod equidem ex causæ materialis indole, ad malignitatem prona existant, facile sub causarum, materiam malignam exaltantium concursu revera malignæ evadant, verum his causis deficientibus, frequenter etiam satis benigne, & sine specialis malignitatis indicio occurrant atque decurrant: licet in comparatione ad reliquas benignas, simpliciter tales, propter hanc dispositionem malignarum titulum mereantur. Ad harum classem merito referimus febrem petechizantem, purpuram, variolas atque morbillos, de quibus quotidiana experientia loquitur, quod, si malignitatem exferant, ordinarie talem exaltationem & exacerbationem causæ, vel a regimine & methodo, vel a peculiari aëris epidemica constitutione experiantur.

## V.

*Differunt porro hæ febres respectu presentia exanthematum.*

## SCHOL.

Sunt enim ex illis, quæ semper exanthematibus stipatae sunt, nec unquam sine illis occurrunt, & ex parte ab illis denominationem suam habent: quorsum referenda est pestis, febrisque pestilentialis, in quibus vel anthraces, vel bubones, vel maculae petechiales adparent: febris petechialis, variolæ, purpura atque morbilli.

Siquidem ex altera parte febres quoque malignæ & contagiose occurrunt, quibus exanthemata vel plane non solennia, vel ad minimum

mum æque infrequentia existunt: & huc referimus febrem petechizantem, exinde nomen suum habentem, quod maculæ petechiales quandoque adsint, aliquando vero absint, præsente tamen eadem febris essentiali specie & typo: pertinent huc quoque tam catarrhalis maligna & Hungarica, seu castrensis, a loco natali, modoque primæ communicationis & propagationis ita dicta, quam febres compositæ, malignitatem aliquando conjunctam habentes,

## VI.

*Subjecta, his febribus in genere præ aliis facilius obnoxia, graviusque decumbentia, sunt personæ, quoad etatem ju-niores, plethorica, & quoad temperamentum floridiores & activiores.*

## SCHOL.

Ut enim taceamus pronitatem ac facilem proclivitatem ad suscipiendum motus, qua juvenes & activæ personæ gaudent præ senioribus, & segnioribus, juniores, etiam majore ordinarie laborant plethora, quæ per se motus extraordinarios solidarum ac fluidarum partium minus tolerat, iisque impedimento esse solet; tanto magis autem in statu præternaturali, ubi materia peccans præsto est, corruptionem corpori ministans, sive tempestivam excretionem postulans, hanc summe necessariam excretionem ultra modum retardat, impedit ac sufflaminat, ut tanto graviores noxæ inde emergant: unde vulgus æque ac Medici observare solent, corpora illa appreenter robusta, quadrata & succi plena, graviori periculo sub ejusmodi febribus subjacere.

Ratione temperamenti floridioris & activioris, hic maxime in considerationem veniunt sanguinei, sanguineo - cholericæ, & sanguineo-phlegmatici; hi enim omnes spongioso gaudent corporis habitu, & sanguine mobiliore. Quod autem floridi, & spongiosi habitus personas huc referamus, id ex dupli fit ratione: quoniam hæc corpora, propter pororum fibrarumque laxitatem magis disposita sunt ad receptionem materiae peccantis miasmaticæ, cum aëre advenientis, per corporis peripheriam, & licet non solitarie per poros hæc materia corpus ingrediatur,

sed etiam mediante inspiratione atque saliva deglutita advehatur, sub motuum secretorum validiorum (quos quidem prompte suscipiunt) continuatione, ob eandem fibrarum mollitatem & laxitatem, citius atomiam incurront, & virium motricum debilitatem patiuntur, unde iterum secretionum & excretionum debitarum successus infringitur, materia noxia diutius, quam par est, in corpore detinetur, cum humoribus circumpellitur, iisque tanto promptius labem corruptionis affri-  
care potest.

## VII.

*In specie tamen certæ ætates, certis quoque harum febrium speciebus præ aliis subjacent.*

## SCHOL.

Hoc intuitu variolæ atque morbilli in specie morbi infantiles ac pueriles vocantur, cum longe frequentius faciliusque infantes puerosque corripiant, quam adultiores: cum e contrario reliquæ hujus censu febres, sine tali specialissimo respectu ætatis, homines corripiant.

## VIII.

*Causam materialem proximam febrium malignarum & contagiosarum in genere constituit miasma aliquod peregrinum.*

## SCHOL.

Sub hoc miasmatis titulo intelligimus materiam aliquam peregrinam, & mixtione animali plane contrariam, ordinarie in corpore non existentem, sed aliunde advenientem, seque humoribus nostri corporis immiscentem.

## IX.

*Materia hujus miasmatica indolem magis a posteriori & ab effectu, quam a priori explicare & declarare possumus.*

## SCHOL.

Cum enim quotidie videamus, contagii materiam ab uno corpore alteri communicatam, non esse visibilem, multo minus palpabilem, sed insciis ac invitatis, non advertentibus hominibus, corpus intrare; eandem

pre-

præterea probabilissime pauca, imo paucissima quantitate, ad corpus defiri: multorum tamen atque graviorum motuum authorem evadere: & tandem effectum suum proximum, (si in corpore maneat) corruptione, vel actu putredinoso-fermentativa, vel inflammatoria, vel exulceratoria exserere, prout nempe specifica miasmatis morbos constitutio id concedit.

Exinde merito colligimus, materiam miasmaticam esse 1. tenuissimam, atque halituosam, ut sub halitus subtilioris ac incomprehensibilis forma corpus intrare possit.

2. Quod sit indolis activæ, & modo agilioris, modo agilissimæ, ut paucissima licet quantitate admissa, semel vel ad humores, vel ad partem quandam nobiliorem delata, nec tempestive iterum expulsa, ipsius corruptionem dissolutoriam certissime post se trahat, aut minetur.

3. Quod in specie sit corruptoria, & mixtioni animali e diametro contraria atque noxia, & nisi in corpore vivo, ad minimum tamen in mortuo, putredinem promptissime producens.

4. Quod hæc materia peccans per artem humanam non sit corrigibilis, aut alterabilis, sed solis motibus secretoriis & excretoriis, tempestive tamen, constanter, & placide adornatis, expugnabilis.

## X.

*Hæc materiae morbifica consideratio sufficere potest ad scopum medico-therapeuticum.*

## SCHOL.

Etiamsi hujus materiae texturam specificam, & physicam a priori exquisite determinare non valeamus, nullum tamen exinde redundat damnum in curationem harum febrium: hæc enim ipsius, quam suppeditavimus, contemplatio notanter Medico indicat, quid ipsi circa illam agendum, quidve omittendum aut evitandum sit: nec ullo modo majus respectu therapiæ emolumentum ipsi accrescit, etsi physicam ipsius texturam ac indolem perspectissimam haberet, cum ad minimum ob brevitatem temporis, & activitatem materiae, ejusque tenuitatem summam, nullam ipsius correctionem aut alterationem materialem ac effientiam suscipere, aut obtinere posset.

## XI.

*Causam remotiorem materialem querimus merito in putridis terræ exhalationibus, aëris atmosphärico communicatis, & per consequens in aëre particulis peregrinis miasmaticis referto & inquinato.*

## SCHOL.

Ordinarie enim videmus, contagiosas atque malignas ejusmodi febres non omni tempore, aut anno, grassari, sed certam aliquam aëris constitutionem sequi, sive illa specialis constitutio universaliores, sive particulares causas antecedentes agnoscat, quæ tamen in eo inter se conveniunt, ut generaliter ad motum intestinum putridum disponant.

## XII.

*Ad universaliores ejusmodi causas concurrentes referimus tempestates pluviosas, ulidas, & simul calidas, aut potius tepidas, ventorumque vegetiorum & sicciorum defectum.*

## SCHOL.

Cum enim superflue humiditates vehiculum motus fermentativi constituant, a calore autem particulæ sulphureo salinæ partim suppeditentur, partim commoveantur, hinc deficientibus ventis, has particulæ cito difflantibus & dispergentibus, oritur earundem quasi stagnatio in aëre, majorque intestina commotio: unde, si postmodum cum aëre, sine quo vivere non valemus, nostra aggrediantur corpora, in illis humorum alterationes, & mixtionis similes corruptiones post se trahunt.

Hinc non minus loca ulida, humida, ventorum calidiorum tractui exposita, majorem dispositionem habent, ut febres malignæ atque contagiosæ frequentius in illis observentur.

## XIII.

*Causam magis specialem & particularem antecedentem constituunt effluvia contagiosa, ab aliis corporibus putridis, jamjam presentibus, emanantia.*

## SCHOL.

## SCHOL.

Hujus generis sunt effluvia cadaverum putridorum in genere, vel in specie morbo simili contagioso & maligno extintorum; qua ratione videmus, febres ejusmodi malignas frequentius ortum capere post clades & cædes graviores castrorum, si præcipue corpora occisa vel nimis dia, tempestate existente calida, insepulta maneant, vel non satis profunde sepeliantur, et si fana de cætero fuerint corpora. Multo magis certiusque autem hoc contingit, si febres putridæ malignæ antea jam in casis grassatæ fuerint.

## Pestis, &amp; febres pestilentiales.

## XIV.

*Pestis est febris summe acuta, maligna atque contagiosa, exanthematibus peculiaribus stipata, a miasmate peregrino putredinoso subtilissimo oborta, quod mixtionem animalem putredinosa corruptione proxime destruere valet, epidemice grans, & plurimos agrotantium jugulans.*

## SCHOL.

Pestem in genere ad febres pertinere, satis evincunt phænomena circa illam occurrentia, & excretiones, quas cum febribus communes habet, periphericæ: etiam si enī aliquando exempla legantur de peste sine febre, hæc vel ad plane extraordinaria pertinent, vel plane dubia sunt, cum plurimæ observations de peste, cum & sub febre oberrante, testentur.

Summe acutam hanc febrem esse, testatur acuta ipsius invasio, brevisque ipsius periodus, qua ægri utplurimum ex improviso peste corripuntur, graviter decumbunt, & paucissimis diebus vel evadunt, vel iisdem imo paucis horis, succumbunt, & moriuntur.

Malignitatem pestis testantur summum contagium, lethalis ac summe funestus apud plurimos eventus, gravissima symptomata, malignis febribus in genere familiaria, hic autem gradu majora: Exanthemata alias minus consueta & insolita, anthraces nempe, bubones, & maculæ petechiales extraordinariæ & insolite magnitudinis.

Quod

Quod a materia miasmatica peregrina putredinosa ortum capiat, & epidemice graſetur, id appetet ex effectu putredinoſo, quem ſemper inducit, vel in corpore vivo ſub carbunculis pestilentialibus, in sphacelum abeuntibus, vel in defunctis ſub putredine, mox post mortem invaleſcente, & rigorem emortualem impediente: ſicuti generationem pestis a miasmate adventitio, nec unquam domēſtico, magis teſtatam facit, rarior ipsius, per D E I gratiam, exiſtentia, & quod nusquam ſua ſponte ex intrinſicis domēſticis quaſi, & in humoribus generatiſ causis, ſed poſt ſuppeditatas aliunde cauſas, per eſſluvia aliena aëri, & per aërem corpori communicatas, oriatur.

## XV.

*Febris pestilentialis ab ipſa pefte ſtrictè dicta, diſſert non effentia, ſed gradu.*

## SCHOL.

Hinc febris pestilentialis titulus tali competit febri acutæ & malignæ, quæ non modo instar pefte a ſimili miasmate oritur, ſed periodo breviore reliquas continuas febres longe antecellit, reſpectu exanthematum, ſymptomatum, & lethiferi eventus, proxime ad peftem accedit, tardiore tamen gradu, & diuatore duratione notabilibusque paroxysmorum formationibus a pefte ipſa ſeſo diſtinguit.

## XVI.

*Subiectum pefte & febrium pestilentialium, reſpectu etatis, ſexus, aliarumque circumſtantiarum, diſſiculter eſt determi- nabile.*

## SCHOL.

Videmus enim, his affectibus corripi ſine diſcrimine, juniores & que ac ſeniores, infantes ac pueros, viros & foeminas, virgines ac maritatas, gravidas, & uterum non gerentes: nec temperamentorum plane diſtinctus concursus hic obſervatur, quamquam negari nequeat, quod facilius miasma contagioſum recipiatur, ac maiore diſſicultate ſupereretur a temperamentis laxioribus, ſpongiosis, plethoricas, & cacoſchymicis, cuius phæno- meni ratio ex antecedentibus facile patet.

## XVII.

## XVII.

*Causam materialem constituit miasma pestilentiale, per contagium aliunde communicatum.*

## SCHOL.

Id quod obtingit, quando a corporibus peste correptis, tam vivis, quam eadem oppressis & putrescentibus, effluvia ejusmodi maligna putrida exhalant, aëri permiscentur, & cum aëre, etiam si illum non totum inquinent, tanquam commodissimo vehiculo, ab uno corpore ad aliud, ab una domo ad aliam, & ita ad plura loca successive vehuntur.

Et quamvis non negandum sit, hoc pestilentiale miasma non semper cum aëre immediate ad alia loca deferri, sed etiam mediantibus vestimentis laneis ac lineis, aliisque utensilibus, aut mercibus aliorum transportari, tamen rationi consentaneum esse arbitramur, quod ad minimum potissimum partem, mediante aëre, primo ad illas merces, eaque utensilia perveniat miasma illud pestilentiale: cum non omnes illæ res, quibus adhæret, & cum quibus transportatur, ejus sint conditionis, ut immediate per contactum ægrotantium, sudorem, contredictionem, aut alia hujus generis via, inquinari potuissent.

## Febris petechialis, &amp; petechizans.

## XVIII.

*Febris petechialis est febris acuta continua maligna, & exanthematica, maculis rubris, ictuum pulicum instar, ab aliis exanthematicis sese distinguens, ob causam malignam excitata, frequentissime lethifera.*

## SCHOL.

Hanc febrem de acutarum & continuarum classe esse, nullum subest dubium, declarante id ipsius periodo, & typo.

Exanthematicam illam esse, testantur maculæ, in superficie cutis, præsertim circa collum, humeros, manuumque carpum, aliisque corporis locis, efflorescentes, formam ac faciem morsuum pulicum referentes, a quibus stigmatis tamen defectu distinguuntur.

Malignitatem suam ordinarie declarat, tam ipso contagio, quo facilius patet.

*Coschwitzii Pathologia.*

Gg

cillime

cillime aliis communicatur, quam generaliter eventu deleterio, quo in plurimis ægrotantibus stipata existit, & denique symptomatibus gravioribus, aliis malignis communibus.

## XIX.

*Febris petechizans est species acutarum continuarum, & malignarum, non exquisite maligna, nec semper & exquisite exanthematica, a leviore causa, quam petechialis vera, ortum ducens.*

## SCHOL.

Contradistinguimus merito hanc febrem veræ petechiali, varias ob differentias, circa utramque occurrentes. Præter ea enim, quod ordinarie cum catarrhali maligna pro essentialiter una habeatur, occurrit 1. differentia gradus malignitatis, quippe quæ hic longe levior existit, quam in petechiali: 2. diversitas humoris, specialiter a miasmate morboso affecti, dum hic potissimum lympha, in petechiali autem primario sanguis, subiectum cause constituit: 3. differens frequentia exanthematum, quæ ad petechiale essentialiter, ad petechizantem quasi accidentaliter pertinent, ita ut petechiæ in petechiali emanentes, positivum damnum inducant; quod in petechizante non observatur, dum plurimi ægrotantium exanthemata non experiuntur, & tamen non minus feliciter febrem superant, haud raro autem contingit, ut proventus macularum occasionalibus causis sit adscribendus: 4. differentia quoque eventus lethiferi: quamvis enim utraque febris periculo non caret, gravius tamen, & quasi universale periculum premit petechiale veram, præ petechizante.

## XX.

*Subjecta utriusque hujus febris ordinariè sunt eadem, que §. VI. declaravimus.*

## SCHOL.

Sic enim corpora quoad habitum exteriorem laxiora, & molliora, ex una parte miasma illud morbosum facilius admittunt, atque recipiunt, ex altera autem propter fibrarum mollitiem ejus promptiori expulsioni, & excretioni non sufficient, unde diutius in humoribus moram agendo, facilius illorum mixtionem destruere potest.

Nec

Nec minus status plethoricus ad difficiliorem miasmatis excretiōnem, & secessionem ab humoribus confert: dum materiæ movendæ multitudo motibus non respondet, eosque tardiores efficit: aut si causæ, orgasmum sanguinis & plethoræ commotionem excitantes, vel ex diæta prægressa, vel ab animi pathematibus, vel a medicamentis, accedant, materia miasmatica tanto firmius humoribus irretitur, & via exclusionis præcluditur.

## XXI.

*Causam materialem proximam febris petechialis ponimus  
in miasmate subtili salino-sulphureo, massæ sanguineæ ex aëre  
communicato.*

## SCHOL.

Hujus materiæ effectus in sanguine est dissolutorius & fermentatīvus intestinus motus, sanguinem ita intestine exagitans, ut 'quasi' portiunculæ ab illo secedant, & sub cute stagnationes minores forment, sub quibus tamen miasma illud malignum simul ad cutem defertur, & per illam ejicitur. Et quamquam hæc materia, quoad essentiam, in genere cum miasmate pestilentiali convenire possit, notorie tamen differētia gradus activitatis aut subtilitatis intercedit, quæ quidem in corpore nostro eandem essentiale energiam dissolutorio - putredinosam exferere valet, sed tardiore ac leniore gradu incedit; id quod adparet ex leniore invasione, diutiore duratione, tam totius febris, quam symptomatum periculorum, exanthematum simplicitate, & minore strage, quam in comparatione cum antecedentibus edit, licet effectus in genere sit valde sōnticus & periculosus, & specialiter, si morbus naturam supereret, putredinosus dissolutorius.

De reliquo minus cum quibusdam solliciti fumus, an causa hæc materialis specialissimam aliquam possideat figuram, salibus acribus, acidis & corrosivis similem, fibras sanguinis discidentem, totamque ipsius massam atque compagem hoc pacto dissolventem, & corruptionem massæ humorum producentem: an vero verminosæ, aliasve indolis existat; cum facta talia atque supposita saltim pro stabiliendis certis hypothesis inserviant, nequaquam autem sufficient, ut exinde certus verusque aliquis nexus indicationum curatorialium, causis adæquatus, elici valeat.

## XXII

*In petechizante aut catarrhali maligna eandem quidem supponimus materiam miasmaticam, sed partim pauciorem, aut gradu activitatis debiliorem: partim specialiter magis lymphæ & sero, quam ipsi sanguini inherentem.*

SCHOL.

Adparet hoc exinde, quod hæc febris principaliter sit catarrhalis, & causas catarrhalium agnoscat, in hanc vero malignam & exanthematicam quasi degeneret, ex accessu materiæ miasmaticæ, & malignitatem secum vehentis: unde quoque excretio exanthematum vaga est, ita ut modo plane deficiat, modo adsit, modo etiam sub purpura forma adpareat.

## XXIII.

*Causam occasionalem sèpe constituunt varia corporis alterationes, ab aëris vicissitudinibus perpetuae.*

SCHOL.

Sic v. g. in causa esse potest enormis aestivus calor, eumque excipiens repentinum frigus. Cum enim sub calore eximio humores nostri corporis valde exagitentur, atque abhinc in particulas salino-sulphureas facile resolvantur, quæ tanquam noxiæ tempestivam sui excretionem postulant, accessus frigidæ auræ, hanc excretionem, per corporis peripheriam contingentem, impediendo, damnum, mixtioni animali adfert particulas illas in massam humorum retrudendo, quæ, si cum effluviis miasmaticis concurrant, communem cum illis causam faciunt, tantoque graviora damna sanitatis producent.

Sic etiam pluviosæ & frigidulæ tempestates, vernali & autumnali tempore familiares, ad affectus & febres catarrhales in genere disponunt, quibus si specialia miasmata & effluvia jungantur, catarrhales malignæ, seu petechizantes, inde ex complicatione causæ, originem ducunt.

## Variolæ.

## XXV.

*Variolæ sunt febris acuta continua & exanthematica*

spe.

Gg3

*species, exanthemate pustulari apostematico-ulcerascente, ab aliis exanthematicis se se distinguens, per contagium facile propaganda.*

## SCHOL.

Loquimur hic de variolis veris, & stricto nomine ita dictis, de quibus universalis observatio testimonium præbet, quod sub febrili typo atque periodo continuarum & acutarum decurrant; quamvis in uno altero subiecto gradus hujus febris adeo mitis sit, ut vix ægrotare variolos infantes dicere fas sit.

Contagiosas esse variolas, iterum quotidiana observatio docet, dum non modo ab illi. Stahlio notatum est, totum variolarum proventum in genere Afris deberi, easque ab illis ad Europæos per contagium translatas esse, sed toto die videmus, quod variolæ, quando grassantur, ordinarie per contagium alterius propagantur, hac tamen intercedente differentia, ut ordinarie unus homo semel saltim per vitam hoc contagio adficiatur, & valde rarum sit, pluries ab illo unum eundemque hominem affici.

Exanthema pustulare esse dicimus, ab ipsius figura externa, quae distinguit a morbillorum figura semilenticulari, febre papulari, & maculis petechialibus: cum autem sub pustulari forma aliquam cum purpura miliaria habeat convenientiam, notandum est, has pustulas variolosas, in principio eruptionis quidem minores esse, de die in diem vero maiores fieri, die septimo in suppurationem abire, tandem ruptas escharam formare, & plerumque vestigia exulceratae cutis post se relinquere, id quod purpurae nunquam familiare existit.

## XXV.

*Distinguuntur variolæ a quibusdam in distinctas, & confluentes: infantum, & adultorum: benignas & malignas.*

## SCHOL.

Verum equidem est, variolas veras modo apud infantes, modo apud adultos occurtere: modo distinctas, & distincte per corpus distributas, modo confluentes & insigni copia adesse: modo benigniores, modo maligniores adparere: verum licet omnes haec circumstantiae medici attentam considerationem mereantur, nequaquam tamen diversas efficiunt

variolarum species, in historia morborum multiplicandas, manent enim semper essentialiter eadem variolæ, & febris continua exanthematica.

Respectu enim ætatis non differt morbus, sed subjectum morbi, quod etiam respectu temperamentorum differre potest: quemadmodum ratione distinctionis aut confluxus variolarum symptoma saltem differt, quæ differentia ut plurimum a causis occasionalibus, regiminis, medicationis, tempestatis, status plethorici, rarius autem ab essentia morbi dependet.

Malignitatem & benignitatem quod concernit, hæc comparativa est; licet enim variolæ alio atque alio tempore benignæ appareant, nunquam tamen omni malignitate intrinseca carent, ita ut ab occasionalibus causis turbatæ, malignitatem non exfererent, licet alio tempore, citra talem occasionalium causarum accessum, epidemice quasi hanc malignitatem secum ferant.

### XXVI.

*Subjectum variolarum generale existunt ordinarie, præ aliis, infantes & pueri: extra ordinem, adulti & seniores.*

#### SCHOL.

Dicuntur itaque variolæ morbus infantilis, quoniam experientia & quotidiana observatio refitis est, non modo infantes, ac puerilis ætatis personas longe frequentius, sed longe facilius quoque illis decubere, quam adultiores aut senes. Id quod potissimum adscribendum esse videtur, partim copiosiori lymphæ in hac ætate præsentia, in qua potissimum miasma illud variolosum hospitatur: partim laxitati & mollitiei cutis, quæ faciliorem variolarum eruptionem & suppurationem concedit: partim denique libertati animi, tunc temporis magis vigenti, sub qua motus secretorii & excretorii liberius & majore tranquillitate succedunt. Interim non adeo raro contingit, ut etiam adultiores, in se senes, variolis ægrotent, sub quibus tamen semper comparative majori periculo subjacent, gravioribusque symptomatibus premuntur, eoque ipso testantur, hunc morbum ætati infantili magis congruum existere.

### XXVII.

*Subjectum variolarum speciale est habitus corporis externus, & in ipso cutis.*

#### SCHOL.

## SCHOL.

Hic nempe pustulæ illæ ulcerascentes ordinarie sedem suam non modo habent, sed habere debent; materia enim variolosa ad ulcerascentium disposita, nullibi commodius tutiusque excerni potest, quam per glandulas subcutaneas, quippe quæ exulcerationem illam præ nobilioribus atque internis partibus faciliter tolerare possunt. Si autem extra ordinem contingat, ut internæ nobiliores partes, tanquam sensibiliores, ejusmodi ulcusculis occupentur, nemo non videt, periculum longe majus subesse propter structuræ, teneritudinis, & officii nobilitatem, qua hæ partes præ illis gaudent.

## XXVIII.

*Causa variolarum materialis neque in sanguinis materni impuritatibus, infanti in utero communicatis, neque specialiter in sanguine, funiculo umbilicali inherente, ulla veritate, nedum probabilitate, queri potest.*

## SCHOL.

Supponunt equidem aliqui virorum celebrium, proximam ac materiale variolarum æque ac morbillorum causam a sanguine materno menstruo dependere, & infanti sub gestationis tempore communicari, unde tamdiu in sanguine, vel in aliqua corporis particula latitare creditur, donec sub motu tali extraordinario humorum in æstum ducatur, huncque specialissimum effectum exulceratorium & suppuratorium producat.

Alii specialiter hanc causam deducunt ab illa sanguinis particula, quæ forsan in funiculo umbilicali hæret, & sub hujus abscissione post partum, non plenarie ab obstetricie exprimitur, sed in vasis umbilicalibus retinetur, eamque sedem sibi servare creditur, donec fortuito casu abhinc in massam humorum deseratur, ibique tragœdiam suam ludere possit.

Si vero omnes circumstantias accuratius pensitemus, facile harum hypothesum infirmitas eluet: cum enim notissimum sit, vitam nostram, si ingestiones ciborum excipiamus, unice secretionibus & excretionibus partium

partium heterogenearum e corpore & massa humorum, conservari, auctumque vitalitatis in eo consistere atque absolvit, nec unicam aliquam corporis partem concipi posse, per quam non quotidie, imo per momenta, sanguis & alii humores transpelluntur, ideoque illæ secretiones & excretiones sine intervallo, diu noctuque celebrantur; quis quæso sibi conceptum formare valeret, quod hæc materia variolosa sæpe per totum vitæ curriculum, ad senium usque ultimum, hic ita quieta manere possit, ut nullam plane noxam in corpore producat, quin potius sub excretionibus illis universalibus, & variii generis, simul e corpore eliminetur atque ejiciatur, aut ad minimum ita subigatur, ac imminuat, ut effectum suum tragicum postmodum edere nequeat.

## XXIX.

*Unde potius nos cum aliis probabile esse affirmamus, banc etiam causam miasmaticam esse, & vel ex aëre, vel per aërem, ad corpus humanum transferri.*

## SCHOL.

Elucescit hoc maxime partim ex eo, quod variolæ adeo facile per contagium ulterius propagantur; partim quod maximam partem epidemice graventur, nec non a speciali aëris conditione leviores aut graviores reddantur.

Unde hanc materiam magis a posteriori consideramus, & ex effectibus quos edit, illius conditiones & qualitates colligimus, in eo consistentes: quod sit 1. subtilis, penetrans, agilis atque activa, fermentescibilis, ejus specialissimæ indolis, ut semel humoribus admixta, salinam exulceratoriam corruptionem, eamque repentinam, illis imprimat: 2. quod sedem suam tam in sanguine, quam potissimum in lympha inveniat; atque hanc ob rationem infantibus familiarior sit præ aliis: 3. quod specialem sui alterationem & correctionem non subeat, ita ut sine damno in corpore manere possit, sed 4. absolute sui excretionem e massa humorum postulet atque requirat.

## XXX.

*Causas graviorum symptomatum merito frequentius in regi-*

regimine & medicatione querendas esse statuimus, quam in materia variolosa sibi relicta.

## SCHOL.

Utut non negemus, aliquando materiam variolosam ita constitutam esse, ut ab illius indole gravissima symptomata orientur, hoc tamen in comparatione sane admodum raro contingit. Longe autem frequenter est, quod variolarum inordinata ac turbulenta eruptio, confluxus, retrocessio, cum omnium reliquorum funestissimorum symptomatum syndrome, vel a regimine nimis calido, vel ab exhibitione intempestiva potum vinosorum ac spirituosorum, aut remediorum alexipharmacorum calidiorum, volatilium: aut a perfrigerio externo ortum capiant.

## Morbilli.

## XXXI.

*Morbilli itidem sunt species febrium continuarum exanthematicarum, contagiosarum, infantes ac pueros pra alii infectans, sub elevatione lenticulari rubra in cute sepe prodens, cum secessione furfuracea cuticulae, sine ulceratione, breviore tempore decurrens: a simili causa miasmatica oriens.*

## SCHOL.

Non opus est, ut illa, quæ de variolis dicta sunt, denuo repetamus, cum febris cum illa quoad typum conveniat, licet periodum breviores servet, (dum ordinarie ad summum undecim dierum spatio decurrunt) subjecta quoque coincident: Unde solum ratione exanthematis notamus, morbillos pustulas nullas formare, neque in ulcerationem cutis abire, sed sub sola cutis elevatione lenticulari, juncta rubidine, apparere, qua secedente, cuticula squammularum instar secedit & abscedit.

## XXXII.

*Causa materialis morbillorum similiter est materia miasmatica, cum aere allata, & corpori communicata.*

## SCHOL.

Id quod iterum eluet e faciliter contagiis communicatione, & Coschwitzii Pathologia.

Hh

epi-

epidemica invasione: interim negari nequit, quod hæc materia peccans, in comparatione ad variolas, vel paucior sit quantitate, vel lenior qualitate, i. e. quod acrimoniam minorem possideat, tantaque agilitate non gaudeat, ut humoribus exulceratoriam indolem ac dispositionem imprimere valeat. Unde fit, ut elevationes lenticulares, sub 'morbillis adparentes, leviori sua acrimonia cuticulam saltim afficiant, salva relieta cute substrata, ut squammulae saltem furfuraceæ secedant, postquam pruritus & ardor præcesserint. Nec minus subtilior & tenuior esse apparet hæc materia, quoniam transpiratione per cutim facilius evacuatatur atque excernitur: ut inde hariolari liceat, morbillorum causam idem suam magis in sanguine & sero tenuiore habere, quam in lympha, strictiore sensu sumta.

## Variolæ spuriæ.

### XXXIII.

*Variola spuria, aut notha, sunt species exanthematis pustularis, externa figura & magnitudine variolas veras emulantis, infantibus ac pueris familiaris, febrem aliquando quasi nullam, aliquando leviorem junctam habens, paucis diebus sine ulceratione cedens.*

#### SCHOL.

Haud equidem hic loci, ubi de febribus malignis sermo est, locum meretur hic adfectus: cum tamen ratione nominis communis aliqua ratio subsit, ut ipsius mentionem faciamus, pauca de illo erunt dicenda.

Notandum autem est, has variolas plane non easdem esse cum vereis: quamquam enim aliqua febris, aut potius febrilis commotio, sepius concurrat, nihilominus illa neque maligna, neque contagiosa deprehenditur: exanthema ipsum quoque extrinsecus quidem variolas emulatur, essentialiter vero ab ipsis discrepat: dum pustulæ vel majores quidem sunt, quam purpura, & magnitudinem variolarum incipientium attingunt, sed acuminatae paoco humore refertæ, minores veris manent, (unde die Spitz = Pocken vocantur) & sine suppuratione descantur. Vel magnitudinem quoque variolarum verarum superant, humoreque

moreque multo seroso-aquo plenas pustulas formant, quæ itidem sine ulceratione rumpuntur, ideoque nomen der Wind- und Wasser-Po-  
cken reportant: vel denique corneam quasi duritatem attingunt, & ita  
citra rupturam exsiccantur, & decidunt, quas vulgus die Stein-Pocken  
nominare solet.

Tota denique periodus, & modus decurrendi, discrimen facit  
harum variolarum a veris, dum neque consueta variolarum tempora in  
genere, neque critica in specie servant, & sine periculo, septem aut  
octo dierum spatio decurrunt.

## XXXIV.

*Subiectum barum variolarum sunt infantes ac pueri.*

## SCHOL.

Admodum enim raro contingit, ut adultiores his exanthematibus  
corripiantur: interim tamen aliquando differentiam habitus corporis,  
laxioris aut siccioris, observare licet in pueris, secundum quam hæ va-  
riolæ acuminatæ, aut aqueæ prorumpunt.

## XXXV.

*Causam materialem barum variolarum in materia miasma-  
tica, aërem insidente, ponere non possumus: sed ut peculiarem  
quandam ac individualem impuritatem humorum consideramus.*

## SCHOL.

Negativæ propositionis ratio fundata est in eo, quod hæ variolæ  
spuriæ neque epidemice graventur, neque per contagium propagentur,  
sed sporadica sint: neque omnibus quasi individuis, sicut veræ, infestæ  
existant: neque tandem certum illum effectum suppuratorium aut ulce-  
ratorium cum erosione cutis post se relinquant. Rectius itaque judica-  
mus, causam materialem proximam consistere in aliqua individuali hu-  
morum disperasia falsa, pauca tamen & levi, quæ sine insignibus motibus  
a natura ad colatorium cutis excernitur: unde etiam videmus, infantes,  
nisi valde teneri fuerint, sub illis vix ægrotare, sed sub leniter diapnoici  
regiminis observatione illas facile tolerare ac superare.

## Purpura maligna.

XXXVI.

*Purpura maligna est febris acutæ, continua, exanthematicæ, malignæ species, graviter ægrotos afficiens, per pustularum miliarium, humore limpido, aut spissusculo albo repletarum, efflorescentiam, ab aliis exanthemicis sese distinguens, ab acrimonia caustica lymphæ potissimum inhærente, ortum ducens.*

SCHOL.

Distinguimus merito hanc purpuram tanquam malignam, partim a chronica illa, quæ vel cum leviore aliqua febrili commotione, vel sine illa, individua de cætero sana corripere, eaque per plures septimanas aut menses infestare solet: partim ab illa, quæ sub specie febrium catarhalium, de humorum discrasia falsa, aut commotione orgastica nimia complicata testatur, & tam ratione symptomatum, quam respectu eventus, in comparatione ad hanc, jure meritoque benigna audit.

Malignitas hujus purpuræ sese declarat partim gravitate symptomatum, dum ægrotantes insigni lassitudine, viriumque prostratione, præcordiorum anxietatibus, sudoribus copiosissimis, lypothymiis, nausea vomibunda, imo quandoque vomitu, spasmis & convulsionibus afficit: partim periculo, funestoque eventu, quem ut plurimum comitem habet: partim etiam ipso contagio, quo aliis frequentissimo infesta existit, & facili negotio communicatur.

Pustulæ ipsæ miliares dicuntur, quoniam externa figura & magnitudo semina milii æmulantur, & asperitatem in summa cute efficiunt: quarum humor contentus de acrimonia sua caustica, partim pruritu, punctura atque ardore, quem in cute efficit, partim effectibus spasticis & convulsivis, quos sub retrocessione, aut insufficiente exclusione, in partibus nervosis producit, sufficiens testimonium præbet.

XXXVII.

*Distinguitur hæc purpura ordinarie in rubram & albam, quarum hæc periculosior estimatur præ illa.*

SCHOL.

## SCHOL.

Cum enim materiæ peccantis excretio, ejusque ad peripheriam cutis propulsio, absque sanguinis motu debito ac proportionato, ad cūtem absolví nequeat, hinc fit, ut sanguinis quoque portio subtilior intimus sub cūtim per vasa arteriosa capillaria simul adpellatur, totaque cūtis, cum inferiori pustularum ambitu, rubeat, & ita purpuram rubram dictam efficiat, cuius pustulæ tamen in apice & que albescunt, humoremque limpидum continent.

Ubi autem, ex defectu sufficientis appulsus sanguinis, ambitus pustularum, & cutis simul pallescit, atque albescit, ibi purpura alba dicitur: id quod partim contingit a primo initio eruptionis, partim sub ipsius progresu, ita ut rubedo peripheriæ ad tempus præsens dispareat, & ita ex purpura rubra, alba evadat, in utroque casu periculi plena.

In priori enim mox ab initio defectus motuum secretoriorum & excretoriorum sufficientium adparet, unde crassior quidem materiæ peccantis portio lento gradu excernitur, subtilior autem, & quæ magis activa & acris existit, circa partes internas nobiliores atque nervosas remanet, ibique effectus spasticos & satis tragicos edit: In posteriori autem casu, ubi ex rubra demum alba evadit purpura, retrocessionis indicium adest, quæ vel a refrigerio externo, vel ab animi pathematibus, spasticas strictruras inducentibus, proficiunt solet. E quibus rite penitatis, facile adparabit fundamentum prognoseos de majore periculo purpuræ albæ, præcipue si rubræ succedat.

Quod autem aliquando dicatur, purpuram rubram & albam simul & eodem tempore adfuisse, id non intelligendum est, quasi duplex hujus affectus species essentialiter distincta adfuerit; sed dependet hoc assertum ab incisitia & minore exercitatione ægrorum, adstantium, aut denique medicorum, summum morbi periculum adfendantium, dum revera rubra purpura adest, sed hinc inde pustulæ quædam, humorem spissorem ac mucidiorem, strictius albicantem, includentes, adparent, reliquæ vero tenuiorem limpidadam magis atque diaphanam lympham serosam continent.

## XXXVIII.

*Subjectum hujus affectus exanthematici ordinarie præ-*

*aliis constituit etas junior, & temperamentum spongiosum molle sanguineum, & sanguineo-phlegmaticum, quibus communiter in specie adnumerantur puerperæ.*

## SCHOL.

Ordinarie quidem dictæ etatis & constitutionis individua facilis purpuræ malignæ subjiciuntur, ob humoris lymphalis majorem abundantiam, facilioremque discrasiam: interim tamen, si specialis quedam epidemica constitutio adest, & morbus hic epidemice gravatur, sine respectu harum circumstantiarum varia subiecta invadere solet: ita tamen, ut ad minimum pro maiore affectus fomentatione dictæ circumstantiæ contribuant: id quod tanto magis facit simul concurrens status cacochymicus, & humorum discrasia falsa.

Puerperas quod concernit, hæ pro subiecto hujus purpuræ principali, qua tales, declarari nequeunt: quamvis enim in se verum sit, puerperas frequenter purpuram in genere, & hanc in specie experiri, id tamen essentialiter a partu & puerperio non dependere videtur, cum satis multæ adsint puerperæ, quibus tale quid non contingit: unde potius cause occasioales, sub puerperio accedentes, accusandæ veniunt. Ad quarum classem pertinet partus laboriosus, sanguinem valde exigitans: vina aromatisata, aut remedia calidiora alexipharmacæ sudorifera, post partum exhibita: regimen positive diaphoreticum, sub statu plethorico injunctum: lochialis fluxus detentio & suppressio: dispositio hæreditaria, a matribus in filias propagata; quæ omnia somitem huic affectui majorem præbent.

## XXXIX.

*Causa materialis proxima purpura maligna itidem est materia quedam miasmatica, subtilis, acris, caustica, & fermentabilis, lymphæ potissimum inherens.*

## SCHOL.

Subtilem ac halitusosam esse hanc materiam, testatur facilis ipsius communicatio per contagium, æque ac modus excretionis periphericæ: quod autem acris & causticæ salinæ indolis sit, lymphæque potissimum inhæreat, id adparet ex sensu illo summe molesto, rodente, ardente, puniente,

gente, & cuticulae erosione, æque ac ex effectu summe noxio convulsivo & spastico, si forte retrocedit, aut nimis segni opera excernitur.

Hæc itaque materia, humores acrimonia sua salina, subtiliter simul sulphurea inquinans, motuque auctiore intestino accidente, in mixtione sua turbans, præsentia sua nervosas quoque teneriores partes afficiens, naturam exstimplat, ut motus tales extraordinarios, pro tempestiva illius excretione suscipiat, eamque tanquam acrimonia sua & humoribus, & partibus internis nobilioribus nervosis valde inimicam, ad peripheriam propellat, ubi tenerrima ipsius portio sub sudore & madore, specialissimum odorem acidò - sulphureum spirante exhalare potest, reliqua vero portio mucoscenti lymphæ permixta, cum hac ex sanguine ad glandulas subcutaneas deponitur, ibique pustulas miliares format, cuticulam ipsam elevando, subtiliter arrodendo, ejus secessionem furfuraceam promovet, sub qua tandem, si bene cedit, iterum disparet, & ut plurimum temporibus criticis absolvitur.

## XL.

*Cause remotiores antecedentes & occasioales potissimum querenda sunt in prævia dispositione ac pronitate lymphæ ad impuritatem mucidam aut falsam.*

## SCHOL.

Hæc enim, sicut originem dicit atque fovetur a vita sedentaria, potuum defectu, excretionum præcipue periphericarum suppressionibus, diætae acrioris, tam salinæ, quam sulphureæ abusu, ita, si causa illa proxima miasmatica accedit, huic præcipuum somitem insinuationis, inhaesisionis, & difficilioris exclusionis præbet.

## Febres compositæ.

## I.

*Febres composite dicuntur, qua ratione periodi ad acutas pertinent, & respectu typi, partim de continuis, partim de intermittentibus participant.*

## SCHOL.

Hæc febres revera ex sua essentia semper sunt continuæ atque acutæ,

tex, dum nullam intermissionem aut cessationem paroxysmorum plenariam formant, sed solum remissionem illis quoque familiarem habent: in eo autem ab acutis, & acutis simplicioribus discedunt, quod singulas paroxysmorum exacerbationes novum frigus antecedat, & intercedat.

## II.

*A speciali typo, quem servant ha febres, speciale repotant denominationem.*

## SCHOL.

Quo magis itaque recursus paroxysmorum cum novo horrore ad typum quotidiana simplicis semel de die accedit, talis febris nominatur quotidiana continua.

Quando vero paroxysmorum exacerbationes diebus alternis recurrent, tertiana continua dicitur.

Si autem inter novum frigoris febrilis recursum & paroxysmi exacerbationem duo intercedant dies intercalares, quartana continua talis febris vocatur.

## III.

*Subjecta harum febrium eadem afferimus, que febribus continuis simplicioribus assignavimus.*

## IV.

*Causam materialem proximiorem, aque ac paulo remotiorem, itidem in genere eandem esse declaramus, a qua continuas simpliciores deduximus.*

## V.

*Causam occasionalem mutationis typi verosimiliter querimus, vel in annorum tempestate ac tempore, vel in motum febrium speciali consuetudine.*

## SCHOL.

Primum conjicere licet exinde, quod tales compositæ febres, secundum typi diversitatem ut plurimum iisdem temporibus occurrant, atque in ea incident, quibus alias ex aëris conditione intermittentes illæ, cum quibus compositionem patiuntur, occurrere solent: unde fit, ut e. g. tertianæ

tertianæ continuæ, tempore vernali, vel incipiente autumno, quartanæ autem continuæ, circa autumnum adultum occurrant, & tunc quasi epidemicæ graffentur.

Alterum exinde apparet, quando non præsente tali anni temporum conspiratione, sporadicæ saltem occurrent, & in omnium circumstan-  
tiarum exploratione, innotescit, quod individua his febribus laborantia, alio jam tempore, intermittentibus ejusmodi febribus jam infestati fuerint, unde natura hisce motibus vel diu, vel sæpe adsueta, nunc in-  
gruente febre continua, eorundem motuum febrilium consuetorum re-  
miniscitur, causa licet adæquata non præsente, & incompletas quasi pa-  
roxyismorum alternationes format.

## Febres duplicatæ.

### I.

*Febres duplices dicuntur, quarum paroxysmi intra con-  
suetum illud tempus, quo semel recurrere solent, bis recurrunt  
huncque typum semel cæptum continuant.*

#### SCHOL.

Sic quotidiana duplex dicitur, quando intra viginti quatuor horas, bini paroxysmi plenaria decurrunt, ita ut v. g. unus illorum tempore matutino ingruat, & ante meridiem absolvatur: secundus post meridiem ejusdem diei ingruat, & versus vesperam finiatur.

Tertiana duplex agnoscitur, quando singulis diebus unus quidem paroxysmus occurrit atque absolvitur, alterni tamen paroxysmi, ratione horarum invasionis, sibi invicem respondent: ita, ut v. g. primus paroxysmorum æque ac tertius, horis antemeridianis, secundus autem cum quarto, post meridiem, ægrotantem invadant.

Quartana duplex dici suevit, quando loco duorum dierum intercalarium, uniusque febrilis, inversò plane ordine, una dies libera manet, reliquis duobus autem semper febris recurrit, quæ tamen utplurimum horas pomeridianas, quartanæ simplici solennes, servare solet.

### II.

*Febres duplicatæ differunt a compositis.*

*Coschowitzii Pathologia.*

I

SCHOL.

## SCHOL.

Compositæ enim ex sua essentia semper ad continuarum pertinent classem, licet ratione horroris intercedentis, intermittentem aliquo modo mentiantur. Duplicatæ autem, modo verae intermittentes sunt, modo compositæ esse possunt.

Quando itaque vera & plenaria intermissio, & febrilis paroxysmi cessatio, ad novum usque horrorem intercedit, tunc simpliciter quotidiam, tertianam aut quartanam duplicum constituunt. Quandocunque autem nulla adest intermissio, sed continuitas febris in aprico est, horror autem febrilis singulas paroxysmorum exacerbationes intercedens, typo tali duplicato recurrit, tunc quotidiana, tertiana, aut quartana duplex continua, merito vocatur: de quibus præterea notandum, quod saepius malignitatem comitem habeant.

## III.

*Subjecta certa harum febrium in specie determinare band licet,*

## SCHOL.

Quamvis enim cholericæ, & ad iracundiam proni, a quibusdam ut talia declarantur, quoniam ad motuum turbas proclives existunt, nullatenus tamen hoc a solo temperamento in specie dependet, sed quotidiana experientia docet, longe plures cholericos a febribus hisce liberos manere, quam ab illis corripiuntur: unde potius hæc febrium mutatio in causarum occasionalium variarum accessu fundamentum suum habere videtur.

## IV.

*Causæ duplicationis febrium ut plurimum sunt occasione, eaque variæ observantur.*

## SCHOL.

Causas ipsius febris in se spectatæ, hic non repetimus, cum illæ generaliores sint, vel continuæ, vel intermittentis, ad cuius classem respectu typi generalis pertinet. Reduplicatio autem paroxysmorum speciales utique agnoscit causas: quas ordinarie vel in erroribus diæticis: vel in animi pathematum exacerbationibus: vel in debitum excretionum neglectionibus & suppressionibus: vel denique in turbulentis medi-

medicationibus, sub febribus simplicibus commissis atque perpeſſis, quærendas esse, constans observatio docet: ita ut hinc paulo rarius sit, febres ejusmodi duplicas videre, quæ non ex simplicioribus prægressis in has degeneraverint, niſi forſan aliquando materiæ peccantis nimia copia aut ſpecialis diſpositio, mox ab initio febris, huic ſchemati anſam dederit.

## Febres chronicæ. Febris lenta.

### I.

*Febris lenta eſt febris chronicā, continuārum typum proxime ſervans, ex febre antecedente alia continua, rariflme ex intermittente, orta, atque in hanc degenerata, lento qui-dem gradu procedens, agros tamen valdopere debilitans, atque ſudoribus largioribus enervans, & quaſi ad tabem deducens.*

### SCHOL.

Antequam ad ipsas intermittentes febres tranſeamus, merito illas chronicas conſideramus, quæ quaſi in medio inter continuas & intermittentes poſitæ ſunt, lentam nempe, & hecīcam. De quarum priore hic loci notamus, lentam illam a Medicis dici eam ob rationem, quod neque periodo, neque impetus gradu, acute procedat, ſed lento fa-ti paſſu incedat, interim tamen ſub illo lentore vires ægrotantium in-dies ita enervet, ut merito ein ſchleichendes und zehrendes Fieber vocetur.

Chronicam autem hanc febrem declaramus, quoniam, licet ratione typi ad continuārum classem revera pertineat, & ſpuriam quaſi conti-nuām conſtituat, respectu periodi tamen ab illis abludat, & ad multas ſeptimanias, unum alterumve mensem duret, atque decurſum ſuum pro-trahat.

Febrem conſectariam aut ſecundariam hanc lentam vocamus, quo-niam admodum rariflme per ſe oritur, ſed ordinarie ortum trahit ab aliis febribus prægressis, five illæ ſimpliciter acutæ continuæ, five com-potæ, five intermittentes denique vehementiores fuerint.

## II.

*Subiecta hujus febris ut plurimum sunt individua teneriora, sensibilia, & ad cholericum temperamentum magis inclinantia.*

## SCHOL.

Hinc videmus, faciliori negotio infantes ac foemellas in febrem lentam delabi, si alia acuta continua laboraverint febre, quia partim debiliores, partim sensibiliores existunt.

## III.

*Causa hujus febris generaliores eadem sunt cum illis, a quibus febris antecedens ortum duxit.*

## SCHOL.

Cum enim hæc febris ex illis nata sit, liquido apparet, reliquias quasi primæ febris hic subesse, propter quas, tanquam leviores aut pauciores, lenti, sed continui motus secretorii & excretorii a natura continuantur, eum in finem, ut viscera nobiliora a labe quadam imminentia, quam a reliquiarum illarum febrilium translatione accipere possent, liberentur & præserventur.

Si autem aliquando, (quod tamen rarissime accidit) citra prægressas ejusmodi febres oriatur, causæ tamen materiales cum illarum causis eadem erunt, licet gradu quantitatis aut qualitatis diversæ, ideoque minorem motuum secretoriorum & excretoriorum gradum requirentes, aut, si forsan aliquando quantitatis & qualitatis ejusdem cum illis essent, subiecta ad minimum vel robustiora, vel minus activa invadentes, in quibus a natura motus contra materiam noxiā vel minore impetu suscipiuntur, vel materia peccans faciliori negotio in corpore toleratur.

## IV.

*Cause specialiores & proximiores, qua transitum illius aliarum febrilium in banc promovere possunt ac solent, ut plurimum sunt occasioales.*

## SCHOL.

Huc referri debet regimen diapnoicum sub primariis febribus, vel a Medico non sufficienter injunctum aut observatum, vel ab ægris ipsis

ipsis neglectum atque posthabitum: quando nempe sub paroxysmorum remissionibus madorem provenientem per immoderatas ventilationes, stragulorum remotiones, corporis jetigations, potus frigidi immode-  
stas ingurgitationes reprimunt atque impediunt.

Nec minus præpostera febrium primariarum tractatio medica, quan-  
do nempe, præsertim apud teneriores ægros, febres ejusmodi continuæ  
aut compositæ multis alexipharmacis, bezoardicis calidioribus sub æstus  
paroxysmo tractatæ, aut variis tentaminibus per venæsectiones, alexi-  
pharmacæ, adstringentia, opiate turbate fuerunt: aut intermitentes ve-  
hementiores, neglecta vera causa, hujusque remotione per adstringentia  
saltæ suppressæ, non vero curatæ sunt.

## Febris hec̄tica.

### V.

*Hectica febris est febris c̄hronica, ad intermittentium ty-  
pum magis inclinans, tabidam corporis consumtionem successi-  
vem inducens, ordinarie visceris alicujus nobilioris lesionem vel scir-  
rhusam, vel ulceratoriam pro fundamento habens.*

### SCHOL.

Chronicam ac diuturnam hanc febrem esse, evincit quotidiana ob-  
servatio, dum omnibus notissimum existit, hanc febrem non modo per  
plures septimanas aut menses, sed multos per annos durare, ægrosque  
illam ferre. Quod ad intermittentium typum magis inclinet, & de ha-  
rum magis indole sit, id monstrant notabiles illæ alternationes & inter-  
missiones paroxysmorum, quibus in specie post pastum ægri affliguntur:  
licet enim hec̄ticæ nunquam sanitate gaudeant illæsa, tamen non omni tem-  
pore febre afficiuntur.

### VI.

*Dif fert hac febris ab antecedente febre lenta.*

### SCHOL.

Confunduntur saepius hæ febres a medicis, dum communiter pro  
febre essentialiter una eademque venditantur, iisque sola diversitas gra-

dus adscribitur, & lentæ minor, hec̄ticæ vero consummatus gradus trahit, in quo tamen a veritatis via aberratur. Licet enim utraque febris chronica existat, & quædam symptomata adsint communia, nihilominus tamen differentia quoad periodum, typum, causas, & eventum notoria utramque intercedit.

Periodus enim in hec̄tica multo longioris durationis existit, quam in lenta, cum notissimum sit, hec̄ticos veros per multos annos febrim hanc tolerare, & munia sua, licet cum molestia, obire posse, eum e contrario lenta febris, quamvis diutius præ reliquis continuis & acutis decursum suum ad aliquor septimanas continuet, nunquam tamen ad multos menses, longe minus autem annos, durare soleat.

Nec minus typus febris aliter se habet; dum lenta febre laborantes ab ipso paroxysmo fere continue infestantur, & ad labores subeundos inepti redduntur; hec̄tici vero ut plurimum exacerbations qualescumque post pastum, aut notabiles alterationes, temporibus anniversariis patiuntur, & contabescentiam quoque corporis magis successivam præ illis experiuntur.

Causa vero proxima hec̄ticæ febris non est febris aliqua antecedens, in hanc solitarie transiens, sed potius est continens quædam, semperque præsens causa, sedem suam habens in nobiliore quodam viscere corporis interno.

Eventum quod attinet, ejusque prognosin, notandum est, lentam febrem ordinarie, si modo recens fuerit, non admodum difficulter sanari, cum vera hec̄tica potius ad febres incurabiles pertineat: lenta quoque sèpius in pristinam cardinalem febrim transformetur, hec̄tica autem in aliam nunquam mutetur.

## VII.

*Differt non minus hec̄tica ipsa in se spectata, respectu gradus.*

### SCHOL.

Aliter enim se gerit hec̄tica incipiens, quæ sèpe adeo lenis ratione symptomatum existit, vt præter languorem extraordinarium ægrotantes vix quidquam conquerantur, & difficulter satis dignoscatur: aliter vero sese habet in progressu, dum manifestioribus febrilibus alternationibus sese prodit, quæ per multos sèpe annos protrahuntur, etiam si ægroti nondum

dum lecto, aut ad minimum saltem per intervalla, affixi teneantur. Aliam denique faciem præbet, quando plane consummata existit, ægrosque continue lecto adfixos tenet, ubi vires indies decrementum capiunt, talesque corporis de die in diem ad visum quasi increbescit. De qua graduum differentia tamen notari debet, quod aliquando individua occurrant, in quibus transitus ille ab uno gradu ad alterum, haud magnum temporis spatium requirit, sed præsente gravi læsione partis cuiusdam nobilioris, paucō sane tempore cursum suum absolvit.

## VIII.

*Subjecta bujus febris, ratione etatis, esse possunt varia, respectu reliqua conditionis autem observantur individua tene- riora & sensibiliora.*

## SCHOL.

Respectu etatis enim videmus, tam pueros, quam adultiores & senes in hecicam delabi, imo ex una etate ad alteram hecicam traduci: cum causæ, quas hecica agnoscit proximas, ita comparatae sint, ut sine respectu certæ etatis, varia invadere queant individua.

Ratione temperamenti autem sensibiliora corpora ipsi magis sub- jiciuntur & teneriora, unde videmus, facilius saepiusque foeminas illa laborare, & temperamenti cholericu aut melancholici personas: nec tamen illæ excluduntur, quæ de sanguineo temperamento sub his simul participant, cum talia individua partim ratione texturæ corporis, partim respectu animi, & moraliter sensibiliores deprehendantur.

## IX.

*Subjectum cause in hecica constituunt ordinarie partes interne nobiliores, viscerum titulum in media, & infima cor- poris cavitate gerentes.*

## SCHOL.

Id maxime adparet, quando post obitum hecicorum cadavera se- cantur, & ordinarie vel in pulmonibus, vel in hepate, liene, renibus, glandulis mesaraicis, imo quoque intestinis, ac utero irreparabilis aliqua labes, vel substantiam, vel officium illarum partium notorie laedens de- prehen-

prehenditur. Unde etiam aliqui medicorum ansam ceperunt, ut hecicam distinguerent in pectoralem & abdominalem: ubi tamen notamus, pulmonalem aut pectoralem hecicam nihil differre a phthisi, sed cum hac idem esse: hincque strictiori sensu & nomine hecicam semper esse abdominalem.

Facit interim hæc distinctionis cognitio multum in praxi, ut Medicus tanto cautius procedat in ipsa cura, ne forsitan tussi hecicorum occurrendo impingat, & tussim sicciam hypochondriacam, scirrhis in abdomine contentis familiarem, pro phthysico-pulmonali habeat, & per usum remediorum travmatico - pectoralium, scirrhosam indurationem magis obfimeret, aut expectorantium abusu, copiosum humorum afflum ad pulmones citra necessitatem invitet, ibique novum malum inducat.

## X.

*Causa hecica febris primaria & continens consistit in dictorum viscerum lësione ulceratoria, vel actu jam praesente, & increbescente, vel ad minimum ob scirrhosam dispositionem proxime imminente.*

## SCHOL.

Certissime enim hecica febris oritur, ubi actualis visceris cuiusdam nobilis ulceratio praesto est, id quod videmus in pulmonum, hepatis, renum, aliarumque partium internarum ulceratione, quam semper & sine exceptione hæc febris comitatur: quale quid aliquando, licet longe rarius, in pancreate, glandulisque mesenterii contingere solet.

Quemadmodum vero actuales ejusmodi ulceratoriae lësiones semper & indubitate hecicam febrem comitem habent, ita quoque citra actualē talis lësionis præsentiam hecica febris adesse non solum potest, sed solet, ubi dispositio proxima ad facile subeundam ulcerationem aliujus visceris præsumitur: cuius census sunt infarctus viscerum majores, eorumque obstipations, quibus succedunt indurations scirrhosæ. Notum enim est, quod in visceribus contingent ejusmodi collectiones, tam ipsius sanguinis purioris, quam aliarum materiarum viscidiōrum, quarum partibus fluidioribus & mobilioribus cito & repente discussis,

craf-

crassior portio remanet, quæ scirrhosam talem indurationem siccescentem subit, non ita promte in corruptionem actualēm transeuntem, quæ tamen, si forsan tenuiores & agiliores humores accederent, certissime in corruptionem ulceratoriam transfire posset.

Sub his circumstantiis natura damnum tale in visceribus sentiens, suscipit, quidquid in ejus potestate est, nempe motus humorum, & specialiter sanguinis, queni ad partem affectam magis adpellit, & portionis ibi infarctæ, aut hærentis, dissipationem intendit, aut, si hanc perpetrare nequit, ad minimum reliquam visceris portionem a simili labe præservare studet, quapropter motum suscepturn transpressorium & appulsorium sanguinis continuat, & jugi successu perennat, non tamen pari aut simili impetu, quo uti solet in dissipanda stasi inflammatoria, cum hæc præ illa periculum magis præceps & instans minetur, sed minore quidem, constante tamen gradu causæ, ad corruptionem leniorem proclivi, invigilat.

Cum vero hic motus sanguinis transpressorius in tantum præter naturalem gradum auctus, non sine omni sensibili totius motus circulatorii mutatione & exacerbatione fieri possit, hinc utique contingit, ut patientes calorem quoque præternaturalem sentiant, qui tamen secundum proportionem cause proportionatus & lenis existit.

## XI.

*Differens viscerum conditio, & humorum in illis occur-  
rentium specialis constitutio, ut causa differentis gradus atque  
successus febris hectice, considerari meretur.*

## SCHOL.

Notandum enim est, quod infarctus & scirrhosæ collectiones, de quibus superius diximus, non semper & ubique ejusdem existant indolis, aut periculi præsentanei, sed quod utique differant ratione viscerum eorumque officii, aut structuræ, in quibus hærent. Occurrunt enim aliquando, & quidem haud raro, ejusmodi collectiones nodosæ atque scirrhosæ numero plures in pulmonibus, sub sectione cadaverum reperiundæ, quarum præsentia sufficiens testimonium in vita neque adfuit, neque progressus in ulcerosam corruptionem fecutus est. Cum

Golchowitzii Pathologia.

Kk

enim

enim pulmones magis nudo sanguinis motui transpressorio, attenuatorio, & calefactorio, nec non sanguinis cum lympha accidente intimiori permixtione interviant, quam actuali ipsius depurationi secretoriæ, hinc fit, ut transitus illorum nodorum haud ita promptus sit in actualem ulcerationem, quam in aliis visceribus glandulosis, aut si in ipsis pulmonibus, post rupturam vasorum, extravasatio sanguinis & hujus corruptela contigerit.

Viscera abdominis e contrario, & ex his principaliter hepar, variorum humorum circulationi ac transitui inserviunt, siquidem sanguis, bilis, lympha, serum per illa vehuntur, atque in illis respective seernuntur & depurantur. Unde si in horum substantia tubulosa infarctus aut collectio talis contingat, ex variorum illorum humorum præsentia atque concursu, aliquando etiam speciali discrasia concurrente, præsentius quoque damnum & periculum corruptionis imminet, & simul tanto præsentius febri hectice janua panditur.

### XII.

*Antecedens bujus febris causa aliquando existunt affectus dictorum viscerum prægressi inflammatorii aut apostematici.*

#### S C H O L.

Si enim horum plenaria resolutio, aut mundificatio forsan obtineri non potuit, postmodum ulcerosæ tales lœsiones oriuntur, sanationem non admittentes, quibus tamen ipsa natura, ne imperioso incrementum capiant, continuato, leni tamen, motu humorum abstensorio & præservatorio quasi occurrere conatur, sub motibus huic febri familiaribus.

### XIII.

*Magis adhuc remotæ causæ sunt, omnes ejusmodi occasio-  
nes, quibus ejusmodi collectionibus scirrhosis aut infarctibus  
gravioribus prima ansa suppeditatur.*

#### S C H O L.

Huc merito referimus omnis generis constrictiones, vel a refrigerio externo, repente post corporis exæstuationes perpresso, vel ab ingurgitatione potuum frigidissimorum, glaciatorum, vel a medicatione præ-

præpostera aliarum per adstringentia, vel ab animi gravioribus pathematis ortum trahentes.

## Febres intermittentes.

XIV.

*Febres intermittentes sunt febres chronicæ, continuis, ratione typi, contradistinctæ.*

SCHOL.

Sicut enim continuæ sola remissione gradus æstus febrilis, ejusque novâ exacerbatione, se manifestant, ægrumque continue sub virium comparativa debilitatione detinent; ita ex opposito intermittentes hunc suum titulum gerunt, eam ob rationem, quod non solum primum paroxysmum cum frigore, horrore, aut partium extremarum rigore & tremore, & mox subsequente æstu febrili incipient, sed eundem quoque ad finem ita perducant, ut absoluto paroxysmo ægri plerumque & ordinarie ad orthostadiam iterum perveniant, lectum dimittant, & cœteris paribus, rebus suis præesse possint, donec eodem modo sequens novus paroxysmus illos ad decumbendum cogat, ubi ut plurimum integræ dies, unus vel plures intercalares, quibus ægri de paroxysmo plane nihil sentiunt, intercedunt.

XV.

*Harum febrium, secundum specialissimam typi differentiationem, varie dantur species.*

SCHOL.

Prout nempe unius, aut plurium dierum intercalarium numerus singulos paroxysmos intercedit, dividuntur in quotidianas, tertianas, & quartanas.

XVI.

*Causa specificæ differentiæ typi, tam a materia peccantis conditione, & sede, quam a naturæ agendi consuetudine generali dependet.*

SCHOL.

Solet equidem circa hanc febrium intermittentium materiam ordinarie quoque quæstio formari, quænam sit causa statorum atque certorum

torum temporum recursus paroxysmorum? quam plures in specifico fermento, vel materiæ peccantis specifica fermentescibili indole ponunt, putantes, hanc materiam sanguini communicatam, in illo motum fermentativum materiali contactu excitare, eumque tamdiu continuari, donec ea fermenti febrilis portio sub finem paroxysmi ejecta sit: cum autem non tota materia peccans uno paroxysmo subigatur, aut excernatur, reliquæ portiones itidem per vices ad sanguinem accedere creduntur, novumque motum fermentativum excitare putantur, unde alternationes paroxysmorum explicari posse contendunt.

Verum, licet primo intuitu probabilia hæc adpareant, & ad explicationem recursus paroxysmorum simpliciter considerati aliquatenus quadrare possent, nullatenus tamen ad explicationem stati temporis diem atque horarum recursus sufficient. Unde nos potius causam statutorum illorum temporum paroxysmorum recurrentium, certique ordinis, partim in conditione materiæ peccantis, partim in ipso principio agente, id est, natura, ejusque consuetudine movendi, querimus.

Materiam itaque quod attinet peccantem, rationi consentaneum est, quod *quotidianarum* causa materialis proxima, de bile magis participans, acrior, & magis nociva sit, si diu in corpore detineatur, quam *tertianæ* causa proxima potius in cibis dyspeptis, aut cum nausea affuntis, consistens: utriusque autem febris causa sedem in primis viis habeat, per quas, si præparata atque disposita fuerit, promte excerni potest. *Quartanæ* autem febris causa materialis, tam quantitate paucior, quam qualitate lenior existit, & præterea sedem suam non in locis ad promptas excretiones aptis, sed remotioribus visceribus, eorumque tubulis habet.

Natura autem, uti sapienter dictum est, motus contra materiam peccantem adornat ac fuscipit, ex estimatione noxæ, & facilitate successus motuum, nec non consuetudine generali movendi agit: unde materiam citius aut vehementius nocitaram quotidianis motibus aggreditur, sicuti contra alteram minus nocitaram alternis diebus insurgit, ita tamen semper motus adornat, ut per vices hanc materiam e primis viis ejiciat atque eliminet, per quas facilissimo negotio hanc excretionem celebrare potest.

Quod

Quod autem in quartana longe tardius, leniusque motus suos instituat, id maxime inde dependet, quod in genere melancholicorum motus in statu naturali sint tardiores, humores quoque spissiores, viæ magis strictæ & longinquiores existant, unde natura impossibilitatem celerioris progressus videns, & motibus tardioribus adsueta, diutius repetitis insultibus id agit, quod in alio casu majore alacritate agere solet.

## Febris quotidiana.

### XVII.

*Febris quotidiana est febris chronica intermittens, intra viginti quatuor horas semel paroxysmum, cum frigore & astu febrili recurrentem formans, causam in primis viis hærentem agnoscens.*

### SCHOL.

Quod chronica sit hæc febris, demonstrat ipsius periodus, dum per septimanas aliquot, & ultra certos septenarios, durare solet.

Intermittentem esse, declarat typus, continuarum typo oppositus, quando plenarias, inter singulos paroxysmos intermissiones format, ægrotus orthostadiam concedit, ad novum usque sequentis paroxysmi accessum, singulumque paroxysmum, novo intercedente frigore, incipit.

Quod ex intermittentibus sit quotidiana, nec alia, docet specialissimus paroxysmorum recurrentium ordo, quippe qui singulis diebus semel recurrent, & in alterum usque diem tempus intercalare permittunt.

Quod causa materialis in primis viis hæreat, evincitur ex nausea, conatibus vomendi, imo vomitibus, aut diarrhoeis, huic febri sub paroxysmis ordinarie quasi solennibus: æque ac ex methodo curatoria, qua optime removetur, si nempe hæc excretiones per artem tempestive adhibeantur.

### XVIII.

*Subjectum febris quotidiana præ aliis constituunt tempera-  
menta activiora, cholericum puta, aut cholericò-sanguineum.*

## SCHOL.

Hæc enim temperamenta in genere ad susceptionem motuum extraordinariorum magis prona ac proclivia sunt: & cum ut plurimum causa biliosa subsit, hæc etiam temperamenta, ex faciliori ad iram proclivitate, ad hanc febrem disponuntur. Interim constitutio epidemica aliquando facit, ut alia quoque individua simul hac febre corripiantur, licet modo dicta semper præ aliis facilius hoc fatum experiantur.

## XIX.

*Causa materialis proxima febris quotidiana est saburra vitiosa, in primis viis hærens, & diutius ibi persistens, negotium digestionis & nutritionis successive turbans.*

## SCHOL.

Est hæc saburra vitiosa ut plurimum mucido-viscida, cum biliosa ex parte permixta, e reliquiis quasi ciborum ingestorum, post qualemunque illorum digestionem orta, quæ pro antecedente causa maxime agnoscit errores diæteticos, commissos circa ingestionem ciborum crudiorum, mucidorum, viscidorum, a quibus cruditates & saburra vitiosa primarum viarum ortum capit: quibus deinde proximam ansam suppeditat commotio iracunda accedens, ut tanto facilius febrilis commotio sequatur.

## Febris tertiana.

## XX.

*Febris tertiana est chronicarum intermittentium species, que typum suum speciale declarat alternatione paroxysmorum diebus alternis, ita ut semper duos inter paroxysmos, unus remaneat ac intercedat dies intercalaris.*

## SCHOL.

Signa hujus febris, quæ chronicam & intermittentem illam designant, generaliter eadem sunt, quæ in antecedente notata sunt, duratio nempe periodi ad aliquot septimanas, & plenaria paroxysmorum ad orthostadiam usque ægri, intermissio.

Typum

Typum quod attinet specialissimum, ex signis pathognomonicis constat, hanc febrem, quo magis legitima est, alternis diebus recurrere, novosque paroxysmos formare, qui tempore matutino, intra horam nonam & duodecimam circiter, recurrere solent.

## XXI.

*Subiecta hujus febris præ aliis esse solent sanguinei, aut sanguineo-cholerici.*

## SCHOL.

Hi enim facilius nausea corripiuntur, nec non tanquam paulo molioribus fibris motricibus gaudentes, facilius tono ventriculi laborant debilitato: & cum de cætero facile ingluvie ac voracitate peccent, facilis quoque causam materialem hujus febris coacervare possunt.

## XXII.

*Causam materialem proximam hujus febris itidem ordinarie constituant cruditates primarum viarum, in ventriculo aut duodeno hærentes, atque negotium nutritionis turbantes.*

## SCHOL.

Convenit hæc febris cum antecedente generaliter materiae peccantis, sedisque quam hæc occupat, ita tamen, ut tertiana magis immediate producatur ab illis cruditatibus primarum viarum, quæ immediate sub pastu in his locis coacervantur, & ipsam digestionem proxime celebrandam turbare possunt, sive actu tales fuerint, quæ qualitate sua noxia primas vias prægravant, & concoctionem difficiliorem reddunt, sive quæ in se haud dyspepta existunt, sed cum nausea, aut intercurrente iracundia assumuntur, & ita a natura tanquam molesti, noxii, aut inutiles estimantur. Testantur hoc ipsum excretiones his febribus solennes, vomitoriae nempe & dejectoriae, cum reliquis motibus quasi præparatoriis, hic spectantibus, quibus materiam peccantem tempestive ejicere conatur. Unde videmus, quod febricitantes ejusmodi non solum præsentis materia fastidio ac nausea afficiantur, sed quod defuper novam quoque ciborum ingestionem, tanquam primis viis jamjam oneratis minus convenientem, abhorreant.

## XXIII.

## XXIII.

*Symptomata principaliora, quotidiana & tertiana ut plurimum familiaria, fere eadem sunt, & testantur de motibus naturæ, tunc temporis circa ventriculum susceptis, qui magis materiae presentis evacuationi, quam novæ ingestioni inservire valent.*

## SCHOL.

Manifestant & exserunt se hi motus per cardialgias illas nauseabundas, & conatus vomendi, in primo principio quidem sæpius ob minorem materiae peccantis dispositionem incompletos, eo tamen tempore ordinarie evenientes, quo alias cibos capere solent, aut eum, qui molestus fuit, assumserunt: qui tamen successu temporis completi fiunt, quando natura pro materia peccante immobiliore, vel emollienda, vel diluenda, viisque lubricandis, vehiculum quasi commodioris egestionis adfert, majorēque humiditatis copiam, ex ipsa humorum massa desumitam, congerit atque affundit, eoque ipso excretionem per ventriculum aut intestina facilitat.

Hunc enim in finem, qui ordinario & quotidiano humorum motu obtineri nequit, sub frigore febrili pori externi corporis spastice strinquentur, & humores a peripheria versus interiora extra ordinem compelluntur, quo ipso febrilis paroxysmus initium capit, majorque humoris serosi affusio ad ventriculum & intestina contingit, quo materia peccans ibidem hærens emolliatur, & promte per alterutram viam extrudatur, prout nempe vel materia peccans in superiore aut inferiore primarum viarum regione hæret, vel subiecta magis aut minus evemeta existunt.

## XXIV.

*Transitus frigoris febrilis in æstum secundum circumstan-  
cias presentes est necessarius.*

## SCHOL.

Quamvis actus naturæ, quo humores versus interiora cogit, respectu illius materiæ, in primis viis hærentis, subigendæ & excernendæ citra mutationem frigoris in æstum præternaturalem quadantenus sufficere possit, tamen sanguinis sub hoc rerum statu dispositio ad spissitudinem,

natu-

naturali necessitate sui attenuationem postulat, quæ aliter obtineri nequit, quam per motum auctiorem ac celeriorem transpressorum per partes spongiosas & carnosas, partim auctiore respiratione, partim fortiori pulsu obtainendum. Unde non modo totus corporis ambitus incalescit, atque turgescit, sed sub continuata & repetita illa transpressione per partes tam exteriore quam internas, secretio partium heterogenearum & impuritatum contingit, & ipsa sanguinis depuratio simul obtinetur, quæ finito paroxysmo per excretionem urinæ & sudoris maxime manifestatur.

## Febris quartana.

XXV.

*Quartana est febrium chronicarum intermittentium species, sese distinguens ab aliis per dierum intercalarium duplicaturam, ita ut semper inter primum & secundum paroxysmum duo intercedant liberi dies.*

SCHOL.

Hæc febris ex omnibus intermittentibus chronicæ titulum meretur, dum diutissima est ratione periodi, quam non modo per septimanas, paucosve menses, sed per semestre aut annum sparsius spatium, imo ulterius adhuc continuare solet. Reliqua ex pathognomonicis jam sunt notissima.

XXVI.

*Subiecta huius febris ut plurimum sunt temperamenti melancholici personæ, aut de illo potissimum participantes.*

SCHOL.

Cum enim melancholici ex naturali sua indole sanguine spissiore laborent, ac habitu corporis densiore ac strictiore difficilius ad motus extraordinarios excitantur, præcipue vegetiores & alacriores: verum ad tardiores & pertinaciores: & cum illa dispositione gaudeant respectu humorum, facilius quoque ad varios viscerum infarcitus & obstructiones dilabuntur.

XXVII.

*Causa materialis proxima febris quartanae potissimum Coschowitzii Pathologia.*

L1

conf-

*consistit in sanguinis & humorum spissitudine ac lentore, in viscere quodam abdominalis primario infarctum leniorem prodidente.*

## SCHOL.

Quando enim a causa modo dicta talis levior infarctus, in hepate, liene, aut mesenterii glandulis præsto est, natura contra illam, itidem motibus insurgit, sed longe lenioribus, ast diutius continuatis, quam in prioribus, ita ut sub hac febre magis quasi nudus humorum motus attenuatorius, quam specialis ipsius depuratio occurrat. Unde etiam huic febri notabiles excretiones minus solennes obseruantur, sed natura magis viscerum deoppilationi succurrere videtur. Quamobrem natura eo quasi contenta existit, quod sanguinem lentiore quoque, sed continuato diutius motu restrictorio ad partes internas comprimat atque repellat, & sub frigore diutius ibi coacervatum detineat, sub qua detentio pori & meatus viscerum distenduntur, & magis patuli redduntur, nec non ipsa materia peccans, in ipsis stagnans, lenta & viscida emollitur, & sub accessu motuum tractoriorum in hipochondriis ad abstersionem & divulsionem quasi successivam disponitur; his ita per aliquod tempus continuatis, succedit alter ille motus, a centro ad peripheriam tendens, ita tamen proportionatus, ut causæ substratae saltem sufficiat.

## XXVIII.

*Cause antecedentes & occasioales ordinarie tales sunt, quæ a longinquo quasi, dispositionem ad infarctus & obstructiones producunt.*

## SCHOL.

Hoc nomine ipsum temperamentum melancholicum huc referri debet, ob naturalem sanguinis dispositionem spissiorem, viarumque proclivitatem ad stricturas. Nec minus diæta crassior & crudior progressa, præcipue e piscibus, carnibus fumo induratis, aliisque cibis vappescentibus symbolum confert, a quorum usu mucidæ & viscide impuritates humorum augmentur, quæ successive materiam infarctuum & obstructionum in viscerum ductibus & tubulis suppeditant.

Id

Id quod tanto promptius succedit, si sub tali vietu vita sedentaria cum speculationibus, timore, mœrore conjuncta, accedat: aut si excretiones naturales, præcipue sanguineæ, menstrua & hæmorrhoidales per artifia adstrictoria, aut animi pathemata turbentur: aut denique ab aëre autumnali, sub quo hæc febris maxime familiaris est, excretionum periphericarum præclusione, impuritates variae in corpore coacervatae, humorum lentescentiam producant.

## XXIX.

*Et typus & gradus febris quartanae respondet ordine naturali, causa febrili, ejusque conditioni.*

## SCHOL.

Cum enim haud adeo multa quoad quantitatem materia secernenda & excernenda sanguini inhæreat, natura tali motu contenta est, qui attenuatorum, & quidem modestarum discussioni sanguinis, intus hactenus detenti, sufficit atque responderet, nec proportionem qualitatis materialium movendam superat, sed sanguini spissiori, difficulter alias mobili, adæquatus existit. Unde dependet calor ille languidior febrilis, sub æstu adparens, sub quo sanguis ita movetur, ut ipse non modo successive attenuetur, sed semper quoque aliqua portio illius materialium, in vîlceri harentis, simul abripiatur, & successu temporis tota illius moles consumatur: quod, cum uno quasi impetu peragi aut obtineri nequeat, natura saltem ad paucarum horarum tempus huic negotio vacat, & reliquo tempore interposito, ab illo actu quiescit, donec diebus intercalaribus præterlapsis, denuo actum priorem repeatat, & pari gradu continuet.

Requirit præterea rei & circumstantiarum necessitas, ut motus ejusmodi leniores sub hac febre suscipiantur, quoniam causa, ut dictum est, in obstructione aut infarto quodam visceris, in abdomen contenti, consistit, viscera autem illa ita constituta sunt, ut simultaneos, vehementesque sanguinis impulsus, in statu etiam naturali, citra metum infartus majoris, minus tolerare possint, nec non sanguis melancholicorum, & de hoc temperamento potissimum participantium (quibus hæc febris præ aliis familiaris esse solet) justo spissior, & ad motus cunctiores ineptus est, partesque spongiosæ & porosæ minus patulæ, sed magis strictæ existunt: unde haud mirandum est, quod natura hic cir-

cum spece agat, regulasque sanæ rationis observet, dum lenioribus illis motibus materiæ stagnantis divulsionem & abstersionem quidem inten-dit, sed simul majorem infarctuum successum studiose evitare conatur, interea tamen, ne tota sua intentione frustretur, id quod uno simultaneo actu perpetrare nequit, pluries repetitis, & diutius continuatis motibus & actibus compentare intendit.

## Febres anomalæ, corruptæ, & symptomaticæ.

### I.

*Febrem anomalam vocamus, quando in typo febrili notabilis aliqua irregularitas occurrit, qua a magis consueto ordine paroxysmorum abludit, licet generaliorem unius febris typum servet.*

#### SCHOL.

Sic quotidiana anomala est, quando equidem singulis diebus unum saltem paroxysmum format, eundem vero haud statim ac consuetis horis matutinis incipit, sed vel horis pomeridianis, vel vagis per totam diem, quotiescumque revertitur, modo anticipando, modo postponendo, ægrum invadit: id quod etiam in tertiana & quartana quandoque contingit, iisque anomalæ titulum acquirit.

### II.

*Febris corrupta dicitur, quando febris aliqua sive intermittens, sive continua, qua antea per tempus regularis, typica & legitima fuit, ita degenerat, ut plane a typo consueto declinet, & modo hujus, modo alius febris typum assumat, aut in aliam plane specie febrem mutetur, sub qua tamen non minus corruptionis testimonia, per symptomata insolita adparent.*

### III. CAN-

## III.

*Causæ tam febrium anomalarum, quam corruptarum, ut plurimum sunt occasionales & accessoria.*

## SCHOL.

Dependet enim talis transmutatio febrium ordinarie vel a regimine ægri, quando vel errores diæteticos graviores sub febrili paroxysmo commisit: vel refrigeriis frivolis excretiones periphericas turbavit: vel animi pathematis immoderatis motus inordinatos reddidit: vel denique a medico per varias artes motuum secretorum & excretorum turbationes passus est.

## IV.

*Symptomaticæ febres sunt, que cum alio morbo aut affectu cardinali conjunguntur, ita ut ab illo affectu necessitate physica, aut nexus causalí non dependeant, sed per accidens, & a causa accidentalí, illi superveniunt.*

## SCHOL.

Accedunt ejusmodi febres, & commotiones febriles sub vulneribus gravioribus, ita ut non a vulnere in se spectato, sed ab animi percussione vel iracunda, vel terrifica oriantur, dum vulnus tale sæpiissime sine febre præsto est, & esse potest.

Eiusdem indolis sunt quoque febres puerarum lochiales & lactæ, quippe quæ non a puerperio qua tali dependent, aut ad illud pertinent, dum plurimæ puerarum ab illis immunes manent: illæ autem illis sucjiciuntur, quibus vel lochialis fluxus supprimitur, vel lactis generatio impeditius succedit.

Eundem quoque numerum subeunt febres infantum plures, quæ dentitioni, levioribus affectibus pectoris, alvi adfrictionibus, ac flatulentiis retentis aliquando superveniunt: cum hi affectus æque facile & frequenter citra febris concursum superentur.

Unde, cum omnes hæ febres, distinctas quoad essentiam species febrium haud constituant, satis esse putamus, quod paucis, in quo consistant, atque ab aliis different, indicaverimus: eoque ipso totam febrium materiam, & pathologię specialis sectionem primam obsignamus.